



普濟戰紀

第七冊

U 9  
6255  
7



119  
6255  
7

普法戰紀卷九



南海 張宗良 芝軒 口譯  
吳郡 王 韜 紫詮 輯撰



十二月二十七日。天氣嚴寒。陰霾如晦。凍雲重沍。凜冽異常。於時雪花飛舞。霧氣溟濛。上下蒼茫。幾於一白無際。第十二路普軍。冒寒出隊。以大礮七十六尊。轟擊亞父倫礮臺。蓋於雪霧未下之先。預將礮位。較準遠近。迨至轟擊之際。雪霧漫天。法軍但覺彈如雨下。從空而至。盡墜入礮臺。前後左右。如善射者之矢。無一虛發。卽欲還礮相擊。而朦朧中。莫辨普軍所在。強爲施放。亦了無準繩。憑空漫擊而已。亞父倫礮臺。建於高岡。勢據險要。

敵人以其居高臨下。攻之殊難。未敢輕視。臺中大礮五十二尊。足資拒守。普軍力攻盡日。每礮施放五十輪。勁捷神速。幾至片刻不停。普軍爲法人鎗傷者。僅二十人。奪獲法軍薩士鉢鎗無數。相持至暮。法軍不能支。遂北。一千八百七十一年正月元日。普王在華西路大營。卽眞稱普帝。一切法度號令。悉依帝制。妻稱皇后。子稱皇太子。普人以巨礮轟攻法京。炸彈所及。廬舍爲焚。法王條刺厘行宮。彈已隕於其所。先是普軍奮攻法京外魯士尼礮臺。布辣條亞父倫兩處。欲用飛礮轟入城中。法兵冒死出拒。陣亡者如積。旋棄亞父倫礮臺而奔。鎗礮藥彈。器械甲仗。悉委之而去。普之塞慎尼兵。遂入而據之。普軍旣得此臺。旋卽進攻挪尖鄉礮臺。亞父倫鄉礮

臺。魯尼鄉礮臺。紐威厘鄉礮臺。於是法京洵懼。南城外礮臺。寂無礮聲。普將蠻雕飛攻。取立波微。法之威地厘城。已被毀。普軍之踞棣桑者。自撤兵去。般地已無法軍屯駐。營壘殘廢。礮臺寂靜。普法兩軍戰於刺威烈卑厘威兒之間。普軍往圍披兒尼。又圍俾路佛。普國窩得將軍。離克厘退趨威辰。法將褒巴奇。以大利將加厘波地屯軍於威蘇兒左右。揚言。俟其至。則截而攻之。普郡王乘勝向魯哥來進兵。美師亞城爲普軍圍攻甚急。正月二日。出降於普。俘統兵官九十六人。兵士二千人。獲礮一百六尊。軍實無算。自普人用礮環轟法京。飛彈所至。俱遭蹂躪。城中困迫流離之狀。目不忍觀。法軍駐營於捫得料。其地距法京南方五十里許。普兵攻之。驅之入

羅畢里低布路礮臺。然後用礮轟擊。時普軍屢獲大捷。法京旦夕可下。普王親巡各營。勗勵三軍。曰。嗟爾衆士。邇者捷音屢奏。強敵用摧。繁惟群力。得以至此。尙冀踴躍赴敵。克完大勳。庶幾永享昇平。於後日。普軍自般尼之戰。拔隊盡退。轉向旃城。魯華河左右。法民迭經兵燹。蓋藏盡罄。短褐不完。阿連亞田尼相間處。法民之流徙無業者。飢餓困踣。幾無人色。普王特命發國帑。以資賑濟。無區畛域。飢民之來就食者。不絕於道。賴以存活甚衆。普軍礮攻法京。始在東隅。正月三日。乃攻南隅。五日。法京外東南北三方礮臺。同時並攻。多遭殘毀。六日。普法兩軍戰於亞刺。旋又戰於巴婆。法國扶里地沙將軍。始稍得利。時與法軍拒守者。大將高斌也。親自臨陳。指

麾衆軍。陳擒法兵二百六十人。迨暮法軍奔北。騎隊出逐之。法國來將軍。統集新兵於仙河之左。普將雕梨。乘其未備而擊之。陳擒法兵五百人。獲礮三尊。旗四桿。正月四日。魯哥來礮臺守將。降於普。盡獻其礮臺所有。普人獲礮七十尊。俘兵士三百人。俾龍郡城。法國東北境要地也。距亞刺士九十里許。距巴耽三十有六里。法將飛合。以重兵鎮守其地。普蠻雕飛將軍。統兵往攻。縱橫馳擊。所當悉靡。卒敗法軍。旋即拔營。往威蘇兒。與窩得將軍合兵。共擊法將褒巴奇。不使其阻絕饜道。此時普兵之在法國境者。計五軍。以五大將將之。第一軍統於高斌將軍。屯於那文地。第二軍統於普郡王。屯於法京外魯華河相間處。第三軍統於普王子。屯於法京外圍。

其東方。第四軍統於塞慎尼邦王子。屯於法京外。圍其北方。第五軍統於蠻雕飛將軍。屯於威蘇兒。以截法國外軍之來援。凡步卒五百九十一旗。計兵士五十七萬五千一百人。騎兵四百二十四隊。計六萬六千四百人。礮兵二百八十隊。計七萬四千一百人。大礮一千六百八十尊。此外有整造機器者一萬二千六百人。合之共七十二萬八千人。而臨陳鬪擊者。實有五十一萬人。其餘皆俟精選。而後用。如是兵多士衆。普蓋用全力以制法也。自用兵決戰以來。未有若此之盛者。昔者華鐵路之戰也。法與列國之師。亦不逾十有五萬而已。以此較之。真不可以道里計矣。此古今行師之變也。嗚呼至此。觀止矣。正月六日。麥蓮畢公爵。統麾下第四十四隊兵。

戰法軍於刺科治。第九十四旗兵。攻取拿軒鄉。獲礮三尊。越二日。第九十四旗兵。復取怒賤李多路。正月七日。普國蠻士田兵總。攻俾路佛南方。悉以礮隊往。連環迭擊。轟聲若雷。當曹都士村爲普軍所取。陳擒法統兵官十有八人。兵士七百人。普軍中死亡者統兵官一人。兵士十有三人。被傷者兵士六十五人。正月八日。普國丹年畢將軍。大敗以大利加厘波地於捫伯。九日。普國窩得將軍。大敗法將褒巴奇於威刺華士。其地卽在威蘇兒之南。正月十日。普兵五百人。攻法軍於蝦華。爲法軍所擊退。同日。巴倫尼邑出降於普。俘兵士三千人。計自始攻至納款。凡環圍十有四日。始下其城。按巴倫尼邑。地僅彈丸戶口之數。非臻衆盛。守兵僅三千人而已。十

二月二十八日。普人始行遣兵往攻。是日未正。普營統兵官命使至城下。令其獻城納款。法國守城官弗從。申初。普營遽行開礮轟擊。城中人初未料其如是之速也。斯時居民之往來街衢。貿易市廛者。絡繹不絕於道。市中鋪戶俱開。孩童亦奔走遊行於外。忽聞城外礮發如巨霆。彈若雨墜。火星四迸。烟塵蔽空。居民惶懼。皆避入屋之最下層。其稍上數層。均不能駐足。無何。城中四處火起。號哭之聲。遍聞衢路。最先攻及者為醫館。上有紅旗。飄颺。紅旗者醫館之標識也。於例應得不擊。然普兵以其高聳。礮竟及之。館中居病者。四百餘人。盡移入下層屋中。俄頃間。醫館焚燬過半。墻圯而棟傾矣。次攻天主堂。是堂壯麗非常。為一城之冠。礮彈所至。盡行毀損。

峻宇雕甍。悉為灰燼。僅存一塔。轟然孤立。顧已搖搖將圯。普兵攻至四日。法民漸不能支。乃使一健童子。猱升塔頂。樹一白幟。蓋求普兵之勿攻。意將議和也。旋即遣人前往普營。請於普將加恩釋放婦孺出城。普將不許。其使尙未返城中。而礮聲已隨其後。連環猝起。正月元日。下午。普營暫停轟擊。蓋火藥已罄。有數礮已為法之守兵所擊壞。將更易修理也。翼日。礮發更猛於前。環圍城之四隅。勢據形勝。然城兵三千人。無不以一當十。盡力捍禦。雖巨礮日夜迭燃。而城墻卒不少隳。其守禦之法。可謂嚴密矣。惟是城中居民。艱險異常。初以為居於地庫。粵人呼為土庫。蓋依山築屋。而半入地中者。其制不同窟室也。可以避礮。不意礮彈所墜。自上至下。霎時間。樓房數十椽。盡燃於火。撲救多不能施。

有一婦素日喜行善事。以周恤病人爲本務。一日手持藥料。自樓而下。未及數級。礮彈忽自牕入。半體已飛於他所。隣女方坐於室。礮彈從其面旁過。竟毀其容。擊墻墻爲之洞。有二嬰孩睡於床。亦驚悸死。街市間無人往來。滿地礮彈。火星迸流。人無可避。其藏於土室者。爲濕氣所侵。旋生疾病。室無牕牖。其黑如漆。生死雜居一處。故卽壯健之人。入居二三日。無不委頓困劇者。法人以爲如是攻城。非與兵士戰。徒慘戮我婦孺耳。因詣總兵所。求其出降。爲一城生靈計。總兵堅持不可。曰。吾甯城亡與亡耳。卽脅之以刃。亦不爲動。衆無如之何。越數日。死者愈衆。衆醫士皆勸總兵。勿固守。勢實不可支矣。街衢中尸相枕籍。穢氣逼人。而火燎之味。亦不可向邇。總

兵乃從其言。納降於普營。於是普兵八千人入城據守。當普兵始攻此城也。以爲若是蕞爾一邑。三日可立下耳。不意相持至十四日始克。此由法人之能守也。然普兵雖得城。亦殊勞矣。日夜在風雪中。擐甲執兵者。蓋十餘日無少息云。普人以大礮奮攻法京。礮彈飛入城中者。約二千餘顆。其彈所隕處。已至班地安。疏般及聖熱卑厘士。居民廬舍。亦有被焚者。法國山時將軍。統率精兵二十萬。欲援法京。爲普郡王所邀擊。戰於理溫。麾下所募之勇。心怯善驚。未合陳卽潰。委棄輜重。不可勝數。法軍戰於魯治門。稍利。法將扶里地沙既敗。部衆分駐亞刺城。都宜城。而自往里梨城。普軍往圍蘭嘉。法將褒巴奇。以大利將加里波地。專向南士卑路。佛進發。晝夜

兼程疾趨。揚言欲攻普之窩得將軍。因其屯於威蘇兒以待新軍也。法國撤去蝦華之兵。法國廷臣監必得離波茶城往腮士。法國大營屯於雲耽。普法之軍屢戰於魯華河上。無所勝負。普郡王乘勝由理溫進兵。普軍攻取挪賤里多路。始法兵與之苦戰不利。遂奔。普兵用礮環攻法京外挨扶梨礮臺雲華礮臺及捫道露。飛彈炸裂。兵房悉燬。普軍圍卑路佛已久。其城外近地皆有法兵屯守。以爲特角。普軍以爲非去其聲援。則城不可拔。乃用大礮先攻班遭田。其地在卑路佛之南方。戰敗法人。陳擒兵士七百人。於是附於城下。普郡王麾下之衆陸續西進。攻據刺布厘西鼻拉薩德班治。共四小邑。其循右而行者。則挪賤里多路諸處亦均攻下。法京城中

自經炸彈攻入之後。東北隅數處已遭焚燬。十二日。卑魯城降於普。普國蠻彫飛將軍。總統東路士馬。普郡王大戰。法將山時將軍於里蠻。正月十二日。遂下其城。初普郡王於正月四日。拔隊離阿連。留第九路軍之半。爲城中守兵。遣征往標賤士。駐筈大營。時麾下第十路軍已先屯於雲耽。郡王所親統者。第三路軍。第九路軍之半而已。六日。郡王大營移屯雲耽。其軍甫至。則法國山時將軍與普兵角戰正酣。前擊法兵者。普之第十路軍。第三路軍也。鬪未逾時。法軍陳動。左翼第六枝軍先走。普兵新至者。又從而助之戰。法軍乃大奔。普人乘勝逐之。俘斬甚多。是日。法軍出戰者。乃第十五十六十七路軍也。正月八日。郡王移營往勝加厘士。相度其地形勢。



九日移營往布來亞。十日法軍驟至。普人以第三路軍出擊之。大敗法軍。逐之出林樹外。時法軍至者僅第十二隊。普軍之出戰者。第三路軍中之第九第十第十一枝也。十一日普軍第十二隊。隸於第三路普軍行伍中。十二日第三路第十路普軍。大敗法軍。驅之入里蠻。用礮環攻。遂下此城。法軍之自城逸出者。郡王遣騎兵逐之。郡王之取里蠻也。與法國山時將軍大戰六日。卒敗法軍。而據其地。陳擒將士二萬餘人。奪獲輜重糈糧無算。十三日郡王統兵入城鎮守。十八日以電報達捷於普京。曰敵軍見已退走。亞連干及刺和。我軍尙逐之不捨。計自六日至十二日。連日搏戰。俘其病卒一萬六千有奇。法將山時所統第二軍。殆已潰亡幾半矣。破城之

日奪獲大礮十二尊。糧車六乘。輪車馬車二百乘。普京聞是消息。皆大喜屬賀。時那文地已大半爲普軍所取。惟普軍屯劄其郡者殊少。有郵報主筆之士。驅車遍歷普營。由聖楂問往蠻地。由蠻地往取道於依布父。復徑魯現入雕俾。沿途所見普軍壁壘。寥寥無幾。自魯現外。其左右鄉並鮮普軍。按郡名那文地者。因在八百年前有那文人據守其地。旋歸服於法。後那文人滅法而王其國。故遂呼其地爲那文地。云。普王大會諸侯於華西路。大營佇看普軍之大舉入法京也。普國攻法之南境一小城。曰魯哥華。下之駐兵於其地。城外建有火輪車路。可直達通都。普人用以運載芻糧。忽爲法所屬阿爾及耳之黑兵所焚燬。迨普兵知而往驅。則已不及。於是

普人招募城中之鐵匠。前往修整。工役一聞。令下。散走他所。不復居城。普統兵官出諭。榜諸通衢云。限於翼日午後。需鐵匠五百人。前來普營。修整鐵路。無得稽遲。凡爾督役匠人。其率之速來。如若逾限不至。故意抗違。卽遣兵士。到鄉拘獲。拘得卽置重典。毋赦。以盈五百人之數爲止。普兵不能以恩結法民之心。而徒脅之以威。蓋如此。普人攻法之迷西城。久不能下。迷西城距師丹。不過四十有五里。城中戶籍寡少。僅有民人二萬四千而已。財賦軍需。均未極富裕。然四周礮臺。鞏固異常。而其地亦爲扼據形勝。自蔑士以下。卽當次及。普軍攻累月。不得破。法國兵民。誓死不降。慷慨登陴。嬰城固守。普人竟無如何也。

逸史氏王韜曰。昔子輿氏有言曰。天時不如地利。地利不如人和。法之敗於普也。非地利之不足。失人和之故耳。蔑士天設之險。竟不能守。他可知矣。然如迷西城者。地利何嘗不足。恃哉。夫亦視其人之守禦方略何如耳。由是觀之。城豈在乎大小。人豈在乎衆寡。在其所用而已。人和之說。詎不信哉。

攻法京。法守城軍士。亦還礮相擊。法京北隅。爲飛彈所墜入者。光燄燭天。總統德祿蘇出示告民云。城亡與亡。誓不出降。法京廷臣檄責普人云。用礮轟城之時。何不先期見示。俾城中婦孺得以出避於外。遂遽攻城。抑何殘酷。山時將軍爲普所敗。復往各處。招募新軍。擬與普人再決一戰。法京將士。屢由城出向李波節。達蘭士。藐頓。嘉刺密。以攻普軍。咸爲普軍所擊退。法京各物價值。更貴於前。大狗一頭。約值佛狼二三百枚。其小者亦值佛狼十枚。至二十枚。或三十枚。不等。貓一頭。自佛狼九枚。至二十枚。有以小象駱駝二出售。見者視逾珍錯。爭相購致。駱駝二頭。酬價至佛狼四千枚。小象未有價。按

法京物價本有限制。原不得任意居奇。今固圍已久。各物均匱。故其價亦爲變增。夫法京富麗甲天下。其植基之厚。防衛之密。儼同天府。而一旦窮蹙。至於如此。向之百物殷阜者。至此幾於得一皆難。富者已歎無肴。則貧者不幾嗟無食耶。觀夫離析傷心。死亡滿目。兵連禍結。自古爲然。固不獨爲法京惜也。法京中不僅食物已空。室如懸磬。卽自來火燈卽西人煤氣燈亦已滅熄。因無煤也。一至夜間。昏黑異常。守陴軍士。覲面不識爲誰。時慮普人乘夜襲攻。殊爲危險。軍中有一巧慧之士。因思可用電氣之法。引之發光。遂於礮臺最高處。設立一燈。光大而遠。遍燭城中。朗同白晝。兵民咸相稱慶。不意普營先於黑夜間。莫測法軍動靜。自有此燈。窺伺法京。瞭如指掌。一

切虛實。盡在目中。發礮轟攻。飛彈盡墜入城。法國兵民咸驚。爲此燈所致。謂此燈雖朗耀不夜。而無濟於法京。反以資敵用。於是製燈者。將燈轉向普營。而普人遂不能見法京矣。普軍攻法京稍緩。因連日大霧故也。南北日耳曼諸邦。恭請普王進稱普帝。所遣諸臣工。咸集於華西路大營。普王不獲再辭。乃俯順輿情。曲允臣民之請。正月十有八日。卽眞於華西路王宮。稱帝號踐尊位。宮中有明鑑殿。崇煥非常。普王卽於此朝群臣。成大典焉。群臣咸呼萬歲。時列邦諸王子。群大夫咸在。凡普之郡王。王子。首相。軍師。文武各大員。分侍左右。鼓吹喧闐。拜趨踰濟。其禮儀之明備。典法之崇隆。蓋一時無兩云。尤異者。王子朝賀普王時。屈一左足。普王則俯而抱之。

示優寵也。自後普王所行。一切皆依帝制。所有遣使駐  
節列邦詔書。皆當追改。歐洲自羅馬王該撒以來。未有  
如此之盛者。此亦千載一時矣。按普王受賀之殿。固法  
王之行宮也。層樓複閣。曲舍迴廊。真無殊於建章之千  
門萬戶。相傳是宮建於一千六百六十一年。爲法王路  
易第十四所創設。始基之時。未爲崇廣。迨後來踵事增  
華。遂成巨麗。普王自駐蹕於華西路大營後。在此宮中。  
舉行盛典者。至是而三。是日。普國中。燈綵輝煌。笙歌喧  
沸。遙相慶賀。日耳曼廷臣。於普京伯靈上下議院。宣讀  
普王詔書於衆曰。不穀承日耳曼諸王。聯名勸進。請稱  
帝號。合日耳曼衆邦爲一國。統攝其版圖。君臨其民庶。  
竊思日耳曼相離已六十年。粵稽諸國史冊。由分而合。

歷有紀載。故不得不勉從所請。繼自今。不穀及嗣位之  
主。令於國中。一循帝制。仰祈蒼昊。眷顧我宗邦。康寧勿  
替。無疆惟休。不穀必當力保各邦。永爲自主。克臻強富。  
長享昇平。嗚呼。凡我諸王。無不以忠勇爲翼衛。仁義爲  
折衝。於此而猶有悍敵強隣。爲百餘年以前之憑陵侵  
伐者乎。當斷不然也。自不穀始以逮後嗣王。克承天寵。  
丕錫大權。永以屏蔽我邦家。不獨戰爭時。亦於承平日。  
國勢之隆。如日方中。尙勉之哉。讀竟。群臣皆舞蹈呼萬  
歲。正月十九日。普人再取聖堅田。其地在法國北境。普  
軍前已攻據是城。旋爲法人所克復。普人因特調重兵。  
往圍之。期以必下。十八日。法將飛合屯節於聖堅田城  
外。以爲城中犄角。普軍列陳攻之。小有接仗。翼日已刻。

普軍先據高阜。施巨礮以攻法軍。時法軍第二枝屯於哥魯芝士村。第二十三路軍屯於加士得村。爲法將機士蓮所統。皆附近此阜左右。乘高臨下。無不瞭然在目。環轟互擊。相持半時許。法軍退走。普營四周之兵悉起。踴躍競進。爭先衝突。鏖戰閱兩時。法第二十二路軍居左。稍勝。第二十三路軍居右。旋卻。普軍奮力合擊之。兩路軍皆敗北。法將飛合初欲調左翼以援右翼。特下令已遲。而右翼之軍中餒。力怯心寒。不可復戰。迨至日將西墜時。普軍轉鬪而前。直逼城下。法軍知不可守。遂奔甘布利。正月二十三日。普人取俾路佛城。初普國窩得將軍於正月九日。由威蘇兒往攻俾路佛。屯營於城外。布厘威厘亞境上。始戰。法軍於威刺錫些路。大敗之。擒

者千人。嗣後法軍屢戰皆北。幾於畏。普兵如虎。連日以來。風聲鶴唳。一日三驚。正月十五日。凌晨。法將褒巴奇悉起麾下之衆。與普兵大舉對壘。於時窩得將軍爲中堅。箭於華厘葛。其領右翼者。乃棣尖飛將軍。箭於布厘威厘亞。領左翼者。乃哥魯摩將軍。箭於門卑厘押。此外更有迭士轍是將軍。別統一旅。由門卑厘押。箭至多厘以爲往來應援。法軍亦分四路而出。每路三萬人。第五路十八路。爲魯華河上之兵。第二十四路二十五路。爲來昂城外新招之衆。法將克利馬。統督第二十四路軍。別成一隊。戰之始日。法軍尙有一路未至。次日乃盡集。計不下十有二萬。普國窩得將軍之兵。不過四萬。中有奇兵四千。法國礮兵亦多於普。是日辰刻。整隊出戰。

初以礮攻。繼以鎗擊。自朝迄暮。聲震山谷。普軍死命堅持。不退一步。夜則枕戈而臥於戰場中。十六日。褒巴奇見各軍已集。再攻普軍。先擊右翼。冀盪其陳。而普軍陳勢屹峙。有如山嶽之難撼。法軍見其不可動。遂止。甫合戰。普軍死者三百人。次日約及千人。而法軍喪者不下。一萬。是夕收隊後。普軍仍宿戰場。相戒達旦。第三日。法人再攻普軍。但勢繚緩。而陳曼衍。氣已不振。兩軍角戰。逾亭午。法兵遽走。普人以礮兵逐之。第四日。迭士輟是將軍。再逐法軍。至布理文。殺傷無算。旋即奉命回師。往圍俾路佛城。法軍於十九十八兩日。連退至卑辰干。二十一日。窩得將軍再追法兵。至蘇兒訥。往威刺錫些路。二十三日。追兵直抵露治門。威刺錫些路。一帶村邑悉

爲普軍所攻下。旋復棄之。沿途所有屋廬。均經焚燬。守城將士。親詣軍門。獻城納款。城中軍士。悉俘至普。按褒巴奇所統法兵。其衆十二萬。較諸普軍多幾三倍。而卒至屢經挫敗者。無糧故也。馬糧未發。已四日。兵糧未發。已三日。枵腹臨陳。忍餒衝鋒。雖能戰者。亦不能善其後矣。有被俘法兵。見郵報主筆之士。自指其口言。不食三日矣。其地村落人言。法兵過時。零落參差。漫無隊伍。馬極羸弱。恣食農人所蓄糞草。其飢已極。營中官弁。競啖壞薯。平日以之飼豕者。至此乃以充官食。其苦可知也。法兵退走時。所有敝衣故帽。敗篋殘羶。無不沿途委棄。積幾如山。其後蠻雕飛將軍亦至。與窩得合兵竝進。於是普軍聲勢愈壯。膽氣益強。連日於戰陳間。所殺法兵

無算。而於墨迭兒魯士礮。尤收其效。曾於一發頃。立傷二十一人。彈出遠捷。幾疑於神。有法兵六百。攻普國蘭華兵於巴沙里路。普兵俟其行至一百五十步內。乃用礮擊之。六百人中。無生還者。自陳擒四十二人外。餘悉殞亡。有一普國統兵官。方馳馬指麾士卒。法兵與之相距約二千雅。每雅計英尺二尺四寸以鎗擊之。已中其所佩銀牌洞之。逕過及於肉際。然竟獲無恙。洵稱天幸。是役也。共俘法兵一萬二千人。正月二十一日夜午。普軍銜枚疾進。襲攻棣桑城。約逼城六里許。為法軍諜者所知。時守城總管。乃以大利將加厘波地也。立調精騎相拒。先據德蘭寬田兩隘口。普軍隨據的士鄉。並駐阿地威路小山。以為聲援。其右翼則屯於布林地亞高處。勢相聯絡。加厘

波地之壻堅奧思。智勇非常。韜略勝人。頗能與士卒同甘苦。統轄第五隊法軍。內有以大利兵五百人。加厘波地長子。熟曉兵法。素有父風。統率法國鄉勇。於時聞普軍驟至。乃與堅奧思。領隊出城。是夜子刻。偕普軍苦戰相搏。鎗礮之聲。震眩山谷。炸彈颯至。如颶風之吹。密雨屋宇傾頽。民人傷殞者。不知凡幾。隨軍醫士。亦有被傷者。翼晨昧爽。加厘波地自德蘭親率兵來援。至時兩軍猶未息戰也。有醫士入路旁之屋。暫避鋒鏑。忽有普軍至。瞥觀之。遂止以鎗。不許其轉徙他所。醫士曰。吾固操活人術者。以普濟為事。即在兩軍中。亦何分彼此。若禁置於是間。與爾軍何利焉。厥後普軍劫掠一空。乃去。普軍抵魯現城。徵索佛狼十五兆。以助軍需。正月二十五

日普人取朗威城。初普軍圍朗威。久未得下。至是乃轟以巨礮。越九日破之。擒法軍四千人。獲礮二百尊。朗威城者。法先王路易第十四。所稱爲鐵關者也。一旦失之。遠近震怖。法將山時。收集餘兵。招募新旅。復成一軍。屯於魯華河上。普郡王復馳擊敗之。乘勢襲逐。法兵退往連邑。郡王亦取道於刺和。而回。普國蠻雕飛將軍。逐褒巴奇後隊。過於都河。議者謂褒巴奇。法之名將也。夙諳韜略。負能軍名。其戰於俾佛路也。以兵未訓練。將不用命。精餉不濟。權臣相制。故敗。然則咎不在將之不善。實由於兵之不可用。屢經挫北。夫豈戰之罪哉。初奉廷臣監必得之命。統兵馳赴東境。以援俾路佛。並遏普軍歸路。褒巴奇聞有普軍。卽建築營壘。扼險相拒。而普之來

圍是城者。高得也。一聞調撥之令下。統率麾下將士。捲甲疾趨。三日間行二百四十里。遂抵法營。時所有驍騎

僅四萬餘。而法兵幾三倍。

或云法兵十四萬。蓋無定數云。

然普兵皆精銳。選

鋒。效用無不以一當百。法兵悉係徵募之衆。從未一履行間。兼以器械不精。軍裝未集。凡百所需。無有一備。以此下有離心。士無鬪志。日闕於帥幕之旁。以索餉爲辭。褒巴奇未有以應也。惟喚奈何而已。時廷臣監必得。柄政居心。深刻善疑。特遣心腹之士。監其軍。凡軍中一動一靜。無不飛書告知。故褒巴奇所爲。輒多掣肘。外擁孱兵。內逢暗主。蓋不必兵鋒之交。而敗機已兆矣。至於所部之衆。行列不整。隊伍不齊。老農穉子。錯出其間。均非執戈持戟之儔。且多染足病。患嗽疾。疲困莫狀。衣甲亦



殊敗壞。破帽敝屣。形極可笑。行時背負行裝食具。步履蹒跚。且多以吸烟爲事。其不得烟者。每見吸者。烟氣如霧。妒色可掬。此等軍容。卽不見敵。亦當自潰。此誠褒巴奇。所爲夙夜焦憂者也。普軍既至。遂與接仗。鏖戰三晝夜。勢遂不支。普兵卒奪哈利革城據之。其地扼俾路佛之咽喉。如管之有鑰也。普人守其城者。僅兵五旗。法將特發兵二十三旗攻之。法兵附城轟擊者四次。皆爲普軍所敗。死傷無數。於以見普兵之能守焉。前是普法交戰。皆係普攻而法守。然法常遭挫損。未嘗得一志焉。今次普守而法攻。而勝負之數。又復不同。因此普兵不獨善攻。亦且善守。兼能以少擊多。以寡克衆。此其所以號能兵也。要之普兵雖少。而仍奏功者。以得地利故耳。城

外山阜之可據者。中間一河如帶。亘其前。法兵不能越河。逕過也。顧此城本屬於法。而自法守之。一若地利遂不足恃。則以所用之兵不同也。普兵皆驍健之勁旅。素習於行伍。法兵係徵調之勇丁。未嫻於訓練。故雖多於普兵。亦不足恃耳。俾路佛在法國東南隅。與瑞士邊境毗連。法兵既力不能禦。普遂大呼奔北。普軍逐之。環境三匝。法兵勢迫。無可逃。乃入瑞士境。普軍亦越境追之。按瑞士爲兩不偏助之國。法兵既釋械遁入。普軍不得輒進窮追。故瑞士朝廷行文於普京伯靈。以相詰問。或云。法兵退入瑞士境者。六萬五千人。褒巴奇既收餘衆。退走卑辰干。情沮勢蹙。莫展一籌。正當憤愧不勝之際。忽接廷臣監必得移文。責其通敵輸情。喪師誤國。隳軍

實而長寇讐。褒巴奇閱之。忿甚不語。先是奇自兵敗後。已有拔劍自裁意。自接波茶來書。神情益復憤激。時作殷浩書空態。所部偏裨見其若此。防其有變。幕府中軍器皆移置他所。且刻意提防之。正月二十七日晨起。得廷臣監必得書。閱竟。仰天歎曰。奇雖仰愧朝廷。而當道亦無知我者。竊思部下軍士。名雖八萬。而實可驅使赴戰者。僅三萬五千人而已。餘皆烏合而蟻聚。無怪其所至。輒驚於鶴唳風聲也。而波茶朝臣不知也。惟解以兵敗爲我咎耳。時奇仰而思。俯而嘆。以爲非一死不足以自明。忽盡委巡捕員屬。分投各處辦公。適有先返者。反命後坐於廊下。奇起出。至一巡捕房中。見寂然無人。潛取一小鎗。歸置於枕下。是夕繕寫書札甚多。緘封竟。適

軍營。醫士到訪。坐談良久。時奇憂憤形於顏色。醫士請其暫息。奇曰。唯唯。先生何不早眠。醫士曰。得將軍恩命。坐此爐旁。吾意甚適。奇起就榻。自下其帳。醫士忽聞轟然一聲。亟趨榻前。啓帳視之。則見奇一肱就枕。一手執鎗。嘆曰。天乎不幸。求死無門。蓋奇本欲以鎗自擊太陽穴。因手顫。悞中額際。遂得不死。時廊下之巡捕聞變。亦至。麾下衆將士咸來勸慰。急延醫士調治。而以軍務委別將統理。越數日。傷處漸痊。可無性命虞。奇遂移駐他所。養病。特命裨將往波茶城。接褒夫人來侍疾。及至則夫人已不在。蓋憂波茶之被圍。而先出矣。初裨將往迓夫人時。將器械行李。暫寄卑辰干。及返則普軍環圍其城。不得入。乃急返命於奇焉。嗚呼。謀人之軍。師敗則死。

之。如奇者境雖或同。而情則殊。可諒已。普王聞窩得將軍之一戰獲捷也。大爲嘉獎。諭之曰。將軍能以少擊衆。大挫其鋒。此不世功也。敵兵聞將軍威名。無不震栗。越境窮追。喪膽失魄。自此一戰。而法國南方之衆。再不敢彎弓北向矣。將軍勳猷赫然。豈出古名將下哉。特褒封提督一品。銜以示寵異。法京被圍愈嚴。內外信息俱絕。傳書者。始以氣毬。繼以飛鴿。氣毬之法。雖善。而有時騰至空中。不能自主。惟隨風所吹。或東或西。了無定向。故每有墮於洪洋巨浸之中。曠野窮巖之際者。不惟書札有誤。而居毬內者。亦且有性命憂。是法雖可行。而未盡善也。有法人士顛惹加者。慧性超群。自製通心圓木球兩具。內貯信札。以鉛固其合筍處。使水不得入。球外製

鐵輪二。架置球於河中。使潮水激輪。遂能於河底旋行。順流直下。預爲告知。被困之城。使於河間建一水閘。球流至此。適爲候者獲取。如是則法京雖在固圍之中。而無此善法。外內消息。亦無虞其隔閼矣。法國境中所有電線雖多。盡爲普軍所毀壞。然普軍未至之地。傳遞信息。一如其舊。其馳遞軍情。神速巧捷。實爲無以復加。法國廷臣德祿蘇。猶慮其不爲利而爲害也。蓋恐或爲敵人所得。則不啻舉我之虛實而告之矣。因特製一字典。將西國字母二十六字。按次計數。如某字作第一。某字作第二。某數與某數相合。卽成某字。備著詳悉。傳信時。卽統以數目相示。接信者。如法備考字典。卽能湊聚成文。法頗善也。後普人獲其字典一冊。卽悟其成文之法。

按此法亦不過如電報所傳集數字以成字之法。但以數目代字稍加周折耳。德祿蘇後又別立一法亦係以數相傳。但其按數之法則按數之前後以計。如所傳字係第七數則或取前乎。此三者爲四。或取後乎。此三者爲十之類。其法先與傳信之人約定。則除是人外。卽本國人獲其書。按前字典查之。亦復不成文理。復何論乎。敵人此於電報中。最爲曲折機密者。然卒無解於圍城之一二也。法京當被圍之時。有馬十萬匹。皆雄壯驃健。可以衝突馳驟。以備行陳之用者。自經普軍久困之後。糧絕援窮。無所得食。每日殺馬以享士。迨至議和之時。始得餉糈接濟。然已宰六萬六千匹。蓋去其三之二。其所餘者亦幾瘦劣待斃。不堪騎乘。一切食物無不踊貴。

非常。貓犬螺蚌草根木實無不搜羅充腹。貴宦富室。雖操金錢五十磅入市求牛脯一方。竟不可得。餘物如鷄兔。鴿薯皆視同珍味。較之往時之價。增至數十倍。城中人日得一餐。以爲大福。噫其厄如此。眞爲目不忍見耳。不忍聞者矣。越數日困窮益甚。危迫萬分。上下儲蓄並空。民間幾有羅雀掘鼠之慮。英美兩國均擬購運米粟。前往以濟其急。普以礮轟法京。統計凡二十二日。每日用彈約二萬顆。城中人死者童子三十一人。婦女二十三人。男子五十三人。共一百七十人。此其立時殞命者也。其有被傷者童子三十六人。婦女九十二人。男子一百四十八人。共二百七十六人。其被傷而旋致斃者。統上計之。凡三百八十三人。可見固圍之下。卽非執戈赴

鬪亦難無所喪亡云。普人又以法京之久不下也。傳令大小營中諸將士。用力環攻之三日。此三日中。普兵死者三千人。尸相枕籍。偃斃於道者。連屬不絕。受傷者一千一百二十二人。其中傷未重者。不日可以醫痊。於此可見法人火器之精利。苟施放有準。司礮者能得其人。則普軍殞亡者。當必更多。或論普兵作事。極爲殘忍者。有一法國總兵。統轄阿洲阿爾支里亞黑兵。一日爲普兵所擒。及其卒十餘人。普兵以鎗擊其卒至斃。忽聞法有援兵驟至。普兵出戰而敗。將遁時。繫法總兵之手足。懸之於樑。積薪其下。焚之。久之始死。後經驗尸官審勘。確係焚斃。卽列之郵報中。以志其殘酷不仁。而以普國醫士供詞。備錄於下。或云此事殆由傳聞之誤耳。其實

非也。先是普軍攻入包伊利村。法國黑兵奮不欲降。樓固拒。從樓上鳴鎗。迭擊普軍。而兵總則已至普軍前。陳說願降意。普軍謂之曰。兵皆弗降。而爾獨降。無當也。爾能勸兵出降。則當惟命。兵總遂回。不意甫及樓梯。黑兵誤發一鎗。殺之。及普兵至。縱火樓下。黑兵遂降。兵總之尸。已微經火燬。後爲醫士剖驗。則軀內有法國鎗彈一顆。從氣管而入。立足殞命。其尸之燬也。由死後被火所燃。非係普軍焚死也。普國兵法甚善。而軍律亦極嚴。其攻伊譚皮士城時。有總兵人員。於旅店中。取非其有。然所取亦非巨物。不過一銀匙耳。事發。聞於普王。立發軍令。調至質審。按法懲之。以爲擅取人物者警。夫軍法不嚴。則所至之地。必有不堪者。而普國立法若是。於總

兵人員。且無所恕。則其下者。更不言可知。兵以律整。信哉。普國軍師毛奇。用兵如千將出匣。鋒銳朗耀。犀利無前。前有日耳曼商。特獻一劍。以誌其勳。旋有旅居波添摩之日耳曼數女子。欽仰軍師戰功懋著。特倩美國良工。精鑄一劍。以貽之。其劍長約三尺。白金爲身。黃金爲鞘。而復飾以珠寶。不待出匣。已覺寶光耀目。其價未能懸擬。附郵舶返國呈獻。保險之值。至三千金。則其貴重亦可概見。是則軍師神武之名。閨閣亦爲之盈耳矣。普相俾恩麥。以有大勳勞。由伯爵進封公爵。俾君自總理樞務以來。於國家大計。悉心贊畫。夙夜匪懈。凡有可以致治者。無不勵精圖維。冀臻上理。國家倚之。如干城柱石。王子以下。重之若師傅。所以由次國而升上國。是雖

由在廷大小臣工。同心共濟。而相臣之力居多焉。近以勳業日隆。故朝廷酬功之典。亦有加無已。特進公爵以昭懋賞。英國前有載煤船六艘。路經仙河。普國兵士恐其以是接濟法人也。拘而獲之。盡沉諸海。茲英國以是詰問於普。且言當未拘之先。普軍施放大礮。以擊其人。於例實爲未合。普人覆書任過。且願賠償舟值。許以查核軍士。如有待英船舵工過於苛刻者。必當盡法懲治。以無失普英兩國和好云。正月中。普法之戰。法國亡失大礮八百尊。死傷及被俘者。共三十五萬。法國山時將軍部下。共失軍士二萬五千人。雷將軍部下。共失一萬二千人。華恰備將軍部下。共失一萬人。褒巴奇將軍部下。共失三萬人。法都之戰。共失十五萬。東境法軍

被逐。越走瑞士國者。計八萬人。普國於是月中。所失軍士約一萬以上。所云失者。或傷亡。或俘戮不等。普國自軍興以來。多獲勝捷。雖少有喪敗。而沒於軍務中者。未嘗無人。其最顯者。莫如巴華厘亞王子。按王子爲巴華厘亞國王之弟。與普王誼屬舅甥。王子之母。乃普王之叔女。王子生於一千八百四十七年七月二十四日。少負才名。已具倜儻不群之概。伐法之役。統領其國第五旗兵。所至有功。碧梨之戰。爲法國一黑軍所傷。旋至殞命。年僅二十有三。巴華厘亞王尙未娶妃。並無所出。苟按兄終弟及之例。王子即可嗣承大業。乃竟以派演天潢。委身於原野間。聞者無不惜之。然授命疆場。垂名竹帛。男兒至此。復何所憾。正無徒爲王子悼也。普軍圍攻

法京。凡一百三十日。大小數十戰。正月二十一日。大戰於法京外。乃普法交兵以來。最後之戰也。法軍自城內突出。奮然莫當。普軍見其來也。猛靜以待之。兩軍甫交。火器竝發。然法軍之力已竭。未歷一時。群然竄走。蓋其出伊始。已無紀律。衣甲不備。行列不整。跳盪拍張。徒恃一擊。及其氣衰志餒。則思退避。故戰雖不久。而死傷者已越四百人。尤可異者。被俘中有女子二十人。婦女從軍。勇於赴義。眞有小戎駟馘之風矣。前此十九日之戰。法兵臨陳交鋒。進退均無所主。普人短兵奮接。於是被殺如草。法兵自經大創。因此不敢復出。按法京外礮臺林立。其極關險要者。爲東隅之二礮臺。苟於二十日以前。增置藥彈。嚴密防禦。實足固守。以俟援軍。且可伺隙

制勝乘機圖出。猶不失併糧攬守之要著。惜乎其計不出此也。至於護國軍士。實爲愚甚。皆於胸前作掩心鏡。以自庇。謂可禦彈。不知普軍鎗彈之銳。無堅不洞。曾何有於一鏡。此亦徒增嗚噤耳。里諺有云。大軍之中。日費斗金。此不過約畧言之耳。法國有精通算學之士。自軍興以來。統爲核算。每日一切所需。約自四十萬磅以至四十八萬磅。合之呂宋銀數。幾至二百三十餘萬圓。此非妄爲懸擬也。彼士人家世顯赫。身列縉紳。於軍務無不悉知其詳。統計軍士幾許。卽知軍實軍需。每日共需幾許。然以一日之費。爲數之巨。已至如此。則累月攻戰。其所需者。殆亦非深諳算術之士所能核悉矣。普之圍攻法京也。法民無不怨憤盈懷。裂眦切齒。衆皆謂法國

盡力拒敵。卽爲望救之法耳。法國總理外部事務大臣發孚。行文四境。布告於衆。謂普人攻法如此。實非所望。以此激勵民心。法通國之人。無不見之。但其感動奮發之効。未知何如。論者謂當今之勢。法與普亦惟有出於和耳。如欲報讐洩忿。是重益其疾也。國中壯丁。年至十八。無不出而充行伍。臨戰陳法。都以及各地。聞已購備器械。爲持守一年計。各國駐筭公使。移居於波茶新都。無不急欲爲普法兩國排難解紛者。一俟法京旣下。然後籌議章程。居間勸和。以英公使居首列。蓋議和之舉。於兩國皆有利也。惟以目前形勢觀之。和議大局。恐未能成。何則。攻法京。而法人愈狂矣。普相俾思麥答疏德竇之書。普法決於用兵之意。已彰明較著矣。俾思麥云。



普法戰紀卷九  
備選  
法人披猖悍獠亦太甚矣。今普人不能循歐洲戰陳之例。以待法人。嗚呼。若是戰鬪不休。必兆滅亡之機。法之凶殘。其何以堪。然則議和之事。其可成耶。雖若此。列國公使皆信主而行仁者也。必體上天好生不殺之心。而盡力以勸之和。歐洲列國爲普法戰爭。戍兵境上。以備不虞。駸駸然幾於咸動干戈。夫大兵之後。必繼以歉歲。民既宣力於戎行。無暇勤耕於隴畝。必至土地荒蕪。饑饉薦臻。是則戰其可久乎。法京既下。法人必遷於波茶。普人亦必據守法京。斯時得其府庫。獲其儲蓄。降兵大抵不下五十萬。飢民亂衆不可勝數。勢必騷然不靖。乘機劫奪。普恐一時未得治之也。是可慮耳。故爲普法兩國謀者。議和之策。實出萬全。按此論蓋在法京未下時。

據其所云。眞爲深知時勢者矣。夫普法構兵。普屢勝。法屢敗。日蹙國百里。幾於覆亡之不旋踵。自常人觀之。鮮有不爲普賀者。然國勢固尊。國威固張。而死傷如積。元氣內削。庸有濟乎。法之飢困在於目前。恐普之凶荒亦在日後。何則。戰士多。則耕夫少也。壯者遠離家室。積歲曠時。二十年之後。其生齒必少減矣。且普徒能弱法。而不能滅法。設使法終不和。普得其地。亦不能守。卽曰。鎮以重兵。壓以勢力。而跬步之間。潛伏凶機。同舟之中。無非敵國。一發莫遏。全功皆僨。普能長有法土乎。師勞力竭。財匱民疲。強鄰讐國。且乘機而伺其側。則普且不可爲國。豈得遂以勝法爲福哉。又使法國全土。盡爲普奪。法民懷忿。佯爲服從。外防旣懈。內患卽興。普少留戍兵。

則不足以制攜貳。多留戍兵。則不獨經費無從出。而士卒亦與地不相習。歸路既截。聚族殲旃。亦易易耳。此田單所以復齊。知遠所以覆遼也。故議和則普利多。見盈而不知止。遇盛而不知受。吾方爲普危已。普法相爭。普人咸謂。啓釁構兵。繫法之故。實不知普人有以激之使然也。普人智激法國。凡有四事。當普伐壤之時。許以禮吳河上之地一也。普郡王作制法芻言二也。軍師毛奇親入法境。遍繪地圖。故使法知三也。爵臣夫人至普之時。普官謂。不日必將敗法而取其地四也。嗚呼。普之處心積慮如此。法徒墮其術中而不悟耳。總之恃其強盛之氣。鹵莽以立國。方謂舉天下皆莫可如何。而一旦卒至一蹶不振。驕盈之禍。可不戒哉。前車既覆。來軫方適。

法廷執政諸臣。其能善爲維持之哉。普法之役。相持七閱月。大小百數十戰。皆擁數十萬之雄師。決一時之勝負。幾於激電奔雷。崩山摧石。積尸壑谷。流血川原。自古今以來。未之或有也。今將其自始釁以迄畢役。所有戰事。略爲叙述。以綜大綱。七月四日。西班牙國大帥布廉讓王位於普國李阿佛王子。王子受之。六日。法國總理外部事務大臣加刺門公爵。集議於下議院。謂李阿佛王子。君於西班牙國。法廷獨不許。十二日。李阿佛王子。辭不爲西班牙國王。行文於法國。十四日。普法兩國備兵邊境。置戍設守。十五日。法國朝議。定計興師伐普。普王是日由奄士回伯靈。京師民人出迓者十萬人。十九日。法國檄文至普。普王議於朝。二十一日。法軍始發礮。

於沙北勒城外。二十二日。普兵入法境奇兒。毀斷橋梁。二十四日。在揸士威挑戰。普軍入沙厘嬌棉華交能境。毀其左右鐵路。二十五日。英京郵報總局刊錄普法密約。二十七日。法王委國政於后。二十八日。法王親統六師。由法京啓程幸蔑士。王子亦從行。以重兵鎮守交界之十有四城。八月二日。法軍攻沙北勒城。始用新製神鎗。四日。法大帥麥馬韓巴彥與諸將士決策攻普軍。是日。普王子攻麥馬韓於威心畢敗之。法將都異死焉。擒法軍八百人。六日。普王子與法軍戰於瓦士。法軍敗績。生擒法軍六千人。獲礮三十六尊。帥旗二桿。是日。普人又攻法軍於沙北勒。時統隊者法將富魯實也。由曉至昏。兩軍苦戰。卒逐法軍往孚北。由孚北退走蔑士。盡得

其所建營壘。七日。法京聞兵敗消息。八日。法國羽林俠飛軍及巴彥部衆皆屯於蔑士。九日。普人圍士打拉士卜城。法國廷臣集議於朝。首相阿厘華辭職。十四日。普法兩軍戰於哥些兒彭邑。自夕至曉。互有勝負。十五日。命巴彥爲大經略。統督諸軍。法人議由蔑士退駐瓦但。至克理富律。爲普軍所截。十八日。普人邀擊法軍於克理富律。大敗之。法軍仍還蔑士。二十日。普人焚沙龍法營。二十五日。威地利城出降於普。二十六日。巴彥由蔑士取道於哥些兒。普人擊退之。二十九日。法帥麥馬韓率十萬衆取道於毛臣及加利南左右。潰圍出走。法將飛利取道於標門及土魯左右。潰圍出走。三十日。普人攻飛利於藐士河左。攻麥馬韓於藐士河右。陳擒法兵

七千人。獲礮二十尊。營中輜重無算。法王兵敗。遁走師丹。九月一日。普人克法軍於師丹。越境遁入比利時國者數千人。二日。麥馬韓陳傷。以兵權授雲芬將軍。是日。法王與普人立獻城約。師丹降。法王擄俘法軍十餘萬。所獲鎗礮藥彈器械糗糧山積。自構豐至師丹降。小戰十三。大戰八。一戰於威心勃。再戰於瓦士。三戰於士卑沙連。亦曰半四戰於哥些兒。亦曰彭五戰於威安厘兒。亦曰馬拉六戰於克里富律。七戰於那思兒。亦曰師八戰於褒門。克理富律之戰。兩國軍士皆在二十萬以外。法軍二十一萬。普軍二十七萬。合之計四十有八萬。而普軍多於法者六萬。師丹之戰。法軍十五萬。普軍二十一萬。合之計三十有六萬。而普軍多於法者亦六萬。

哥些兒威安厘兒克理富律三戰其地俱在蔑士城外

亦曰彭五戰於威安厘兒。亦曰馬拉

亦曰師八戰於褒門。克理富律之戰。兩國軍士皆在二十萬以外。

惟威安厘兒之戰。法軍由十六萬。而增至二十萬。普軍僅四萬五千。幾於以一敵四。其卒勝法者。則在普軍之精也。蔑士城外三大戰。普軍喪亡一萬七千人。統兵官六百人。八月中。普人共取法之律司士田力田畢馬梳兒威地厘諸礮臺。九月四日。法國廷臣自立為民主之國。法后於是日。由條刺厘宮出奔英國。五日。普王子塞慎尼邦王子。由師丹進取法京。所俘法兵九萬。由師丹解往普國。八日。法京護國廷臣。檄普王出法境。是日。法后至英國。九日。土蘭城降於普。普兵入城後。藥局驟焚。十二日。法臣爹亞由法京啓行。往說列國。設法退普軍。是日。法國戰艦由波羅的海駛回。十四日。南北日耳曼邦議聯一國。十八日。爹亞由英國啓程往奧京。由奧京

往俄京。十九日。法國雲奈將軍統兵二萬五千人。由法京出戰。普軍於威厘佐扶。爲普軍所擊退。是日。普軍始環圍法京。二十一日。普人取美倫。是日。法臣發孚往普營。議立暫爲息兵約。二十三日。普人取土魯。二十六日。普人敗法軍於美倫。二十七日。士打拉士卜城降於普。俘法兵一萬七千人。三十日。法軍由法京南城出戰。普人擊退之。是日。普人取標威士。九月中。大戰一。即師丹城外之戰是也。小戰十有三。普人共取法之師丹城。土蘭城。美倫城。土魯城。士打拉士卜城。標威士城。十月二日。普人焚紐威厘。五日。普王取華西路爲大營。是日。普人敗法軍於聖堅田。七日。法軍由蔑士北境出戰。是日。法臣監必得乘氣毬出法京。九日。以大利將加厘波地。至多亞城。統督

法之和士兵。十一日。普國丹將軍敗法國魯華河上之兵於亞田尼。是日。丹將軍取阿連城。十二日。法人命以大利將加厘波地爲統帥。是日。普人取以便拿。十三日。法人自焚勝克流王宮。十六日。腮辰城降於普。普人以大礮轟攻三日下之。俘法兵四千八百人。獲礮一百三十尊。十八日。普軍取威蘇兒。同日。取薩雕但。以城中法軍出戰而北。遂乘勢下其城。二十一日。普軍取蔑士外聖堅田礮臺。是日。法人以重兵鎮守亞棉城。二十四日。些利士德礮臺降於普。二十六日。亞美得王子立爲西班牙王。二十七日。蔑士降於普。所俘法軍十七萬有奇。二十八日。法軍自法京出戰。普軍擊敗之。是日。普王封其軍師毛奇爲伯爵。獎有功也。三十日。普人取地仁城。

普法兩軍。攻拒三時有半。始下其城。十月中。小戰三十有七。大戰一。即腮辰之戰是也。普人共取法之華西路。阿連城。以便拿。腮辰城。威蘇兒。薩雕但。些利士德。蔑士城。地仁城。十一月一日。法臣爹亞往謁普相。議立暫息兵約。六日。爹亞所議不成。邁返法京。是日。摩爹挨礮臺出獻於普。俘法兵二百二十人。獲礮五尊。七日。法國廷臣傳檄諭民。令擒巴彥及其所部將士。是日。普人入地仁城。八日。瓦但城降於普。俘法兵五千。獲礮一百八尊。是日。爹亞回多亞城。加厘波地。至阿頓。大閱。九日。普法水師戰於蝦雲拿。是日。普人取巴厘亞。十日。法軍敗普兵於阿連。復其城。普國丹將軍退師多厘。是日。紐布理薩降於普。俘法軍五千一百人。統兵官一百人。獲礮一百五尊。十

四日。麥蓮畢公爵。敗魯華河上之法兵於多厘。十五日。法人命巴刺顛。統率魯華河上新兵。以波厘亞。督領第五路軍。十六日。普與南邦巴華厘亞。立約於華西路。成爲一統。十七日。麥蓮畢公爵。擊法軍於都魯士左右。敗之。副將地士求。遂取都魯士城。十八日。麥蓮畢公爵。敗法軍於薩雕紐父。十九日。普人攻依孚魯士。法兵力拒之。乃退。是日。以大利將加厘波地。擊普軍於薩地龍勝之。二十二日。普人取魯昂。二十四日。普人焚泰安威兒。法人不得已。舉城降普。俘法軍四千人。獲礮二百五十尊。是日。普人取聖堅田。二十五日。普與南邦戈添畢。立約於華西路。成爲一統。二十六日。普法兩軍戰於阿連。又別軍戰於亞棉城外。褒父士。是日。普人擊退加厘波

地於巴士奇。二十七日。拉花亞降於普。普人以礮轟。兩日始下。是日。普人大戰。法國北軍於亞棉城外。二十八日。再戰。普人取亞棉城。北軍退走。是日。魯華河上法兵亦敗。法之別軍擊普人於標刺魯蘭。二十九日。普人敗。法軍於難尼威兒。三十日。法將雕哥律統兵十有五萬。由法京出。駕入橋。以過蠻河。攻珊璧尼村。布禮村。據守門美厘。旋退去。兩軍苦戰。互有殺傷。久之。法軍敗績。十一月中。小戰十有五。大戰五。兩戰於阿連郡。三戰於亞棉。四戰於珊碧尼村。五戰於布禮村。普人共取法之瓦但城。門巴厘亞。紐布里薩。都魯士。魯昂。咸邑。棣定。荷烈。泰安威兒。聖堅田。拉花亞。亞棉。十二月一日。雕哥律退守法京。法國魯華河上新兵。分道攻普軍。普軍皆擊走。

之二日。普人攻取法京外諸村。三日。普郡王敗。巴刺顛於阿連。五日。普人復取阿連城。七日。普人逐魯華河上法兵。往瓦華。十日。法國廷臣復由多亞遷於波茶。以爲新都。十二日。科士比城降於普。是日。普軍離都魯士。分趨華西路。薩得。十三日。普人取布來士城。十四日。門蔑地降於普。俘法兵三千人。獲礮六十五尊。是日。麥蓮畢公爵大戰法將山時於雲耽城外。十六日。法國廷臣檄諭將帥。以兵鎮守瓦華。雕鼻飛禽三處海口。十七日。法廷諭選新兵以備戰。普軍離亞棉城。分搗克拉文。法京。十八日。普王於華西路大營。允列邦群臣之請。進稱普帝。十九日。普將窩得。以大礮攻毀紐士礮臺。二十一日。普人取多亞城。是日。普人擊沉英船六艘於仙河。法京

軍士出戰不利。二十二日。蠻雕飛將軍。敗飛合於怒爹兒。二十七日。普人始以大礮轟攻法京東隅。燬亞父倫礮臺。十二月中。小戰四十。大戰四。一戰於阿連。二戰於標賤士。三戰於霸彭。四戰於雲耽。阿連之戰。普軍十有二萬。法軍二十有四萬。法軍過於普者半之。普人取法之科士北。布來士。門蔑地。正月二日。美師亞降於普。俘法統兵官九十六人。軍士二千人。獲礮一百六尊。四日。魯哥來礮臺降於普。俘法軍三百人。獲礮七十尊。十日。巴倫尼降於普。俘法兵三千人。十二日。卑魯城降於普。是日。法將山時。以二十萬衆潰於里蠻。十三日。普人取里蠻。俘法兵二萬餘。獲大礮十二尊。輜重數十車。十八日。南北日耳曼列邦。遣臣朝賀普王於華西路。普王卽

眞稱普帝。十九日。普人敗法將飛合於聖堅田。復克其城。二十日。普國高得將軍大敗法將褒巴奇。二十三日。普人取俾路佛。俘法兵一萬二千人。二十五日。普人取朗威。俘法兵四千人。獲礮二百尊。正月中。小戰四十有八。大戰四。一戰於里蠻。二戰於俾路佛。三戰於聖堅田。四戰於法京外。俾路佛之戰。普軍約三萬六千。法軍不下十一萬。法軍幾於以三敵一。普人共取法之美師亞魯哥來。巴倫尼。里蠻。俾路佛。朗威。七閱月來。計大戰二十有二。無不色變風雲。聲撼天地。日報主筆之士。從壁上觀者。皆爲目眩神驚。震駭竦栗。而不敢畢視也。圍城二十處。幾於至則必取。其爲堅城名都者三。士打拉士卜也。蔑士也。法京巴黎斯也。法國分疆畫地。共置八十



九郡已爲普所下者三十有二郡。

普法戰紀卷九

終

校合山田榮造

普法戰紀卷十

南海 張宗良 芝軒 口譯  
吳郡 王 韜 紫詮 輯撰

一千八百七十一年正月下旬。法國總統德祿蘇。托疾不出。杜門養病。雲。奈將軍代統其衆。而盡以事權授監。必得攝理。監必得於諸廷臣中。年最少。志銳氣盛。務期一戰以雪耻。然法京已危於旦夕矣。總理外部事務大臣發孚。乃謀於衆中。欲以法京質於普。立暫爲息兵約。俾國中民人。推選紳士。齊赴國會。籌議和款。與普定盟。以救法國之危。衆皆曰可。正月二十五日。發孚乃詣華西路普國大營。先謁普相曰。嗚呼法甚矣。憊惟大國其

圖之。普相爲之悚然動容。延接之頃。禮意優隆。異於前日。謂發孚曰。吾亦爲貴國籌之熟矣。苟有可以爲貴國圖者。敢不竭力。願聞所議何如。發孚曰。此來爲法民請命。願以法京爲質。求貴國息兵。二十一日。俾敵邦得以選人至會。一志議和。始議法京軍士不作孚囚。不釋甲仗。以期無損於軍威。但以空城爲質而已。普相不可。是日。加厘波地擊退普軍於棣桑般。得厘亞左右。有兩村落。爲普將蠻雕飛之軍所焚燬。二十六日。發孚回法京。翼日。親攜各部大臣所定獻約。再抵普營。一切悉依普相之旨。然後其議始成。擬於不日間。法人舉國遵約奉行。法京兵民聞之。一時紛然震動。自是日始。普人不以礮攻法京。息兵約中。其條例大旨有六。其一法京自獻

城納款後。所有城中軍士。悉爲俘。鎗礮甲仗盡行繳出。惟御林護國軍。不在此列。其二法京內外礮臺。悉獻於普。爲普軍所守。其三立約未定。普軍仍不撤圍。須捐佛狼二百兆。以供軍需。其四法軍未獻俘時。仍許留營。其五必當接濟法京糧餉。其六於息兵期內。普軍不得入法京。是午。法官卑吉領取文憑。前往普營。與發孚相見。發孚曰。今日所論者。不獨議質法京。必日後永敦和好。時法國廷臣中。惟監必得獨梗是議。檄示地方官言。必當伺釁復仇。以圖再戰。毋墮於普國算中。宜乘此暫爲息兵之際。力行整頓。預籌守衛。非不欲出於和也。蓋立約章程。必期於保持國體。始可成耳。旋由波茶新都以電報遞音於發孚曰。頃在華西路普營。所立暫爲息兵

普法戰紀卷一  
約略而不詳。未能明悉。與新都廷臣意見不符。苟所議和約。有失於國體。必當力拒。茲於新都。已修戈矛。蒐卒乘。具甲兵。以備再舉。發孚在普營。議和之時。宿於普之總巡捕公所。左右服役之人。皆差弁也。防範甚嚴。毋許一人與之往來。交際出入。皆有隨從之人。法京府尹思謁發孚。屢往不得一見。普國總理行轅謂之曰。嗣後有人再欲來見者。必以刑法從事。其嚴蓋如是。正月二十八日。普法和議始成。普人卽運糧入法京。拯濟飢民。時城中久無食物。得之無不歡躍。全活者無數。普王命所運各糧。宜敷三百萬人食用。此足見普王施仁之溥也。法京消息復得流通。城中民人。許其出入自便。惟他國之人。毋得入內。所有法人前時擒獲之普國船主。概行

釋放。初議於二月十五日。在波茶新都。聚集國會議事。繼而法京波茶兩處廷臣。意見參商。故仍議於法京。發孚刪除監必得所頒檄示。恐兵民由此致亂也。監必得辭職歸田里。暫爲息兵之期。展增七日。俾法國得以遴選人員。從容集議。歐洲諸大國。皆許法爲自主之國。西班牙以大利壤地里三國公使云。朝廷惟遣其往駐法京。若波茶。或有不靖。卽當退去。所定和約條款。其大者共三端。一割邊境兩省地。卽亞路西士省羅連省。如泰安威兒蔑士般地沙厘。均在其內。惟俾路佛仍隸法國版圖。一酬補普國軍餉五千兆佛狼。限期三年。陸續繳清。若賠款未楚。則所有已得之礮臺城池。普國仍以重兵戍守。必俟歸繳既完。乃許撤回戍兵。一割卑鐵甲戰

船二十艘。

此款始有是說。後立約時。即經刪去。按不過據日報言之耳。

他國聞其約內所載。咸

謂其所索過奢。殊失所望。然無不幸其和議之成。多有從中爲之解紛排難者。普國和款始於酬餉一節。議索佛狼一萬兆。繼乃減至七千兆。最後至五千兆而定。蓋其中條目。雖有難從。而以法所處之地揆之。要亦當暫爲曲就。故向以割地爲難者。今亦以爲可。至酬餉之數。始議實爲太鉅。故法人求其減損。屢爲籌商。於是東郡之備兵者。仍紛然也。或謂若所議不成。則干戈必不能戢。普相云。和戰皆無繫於普國之重輕。苟所索不許。卽將刻期攻城矣。英國女王謂其議院爵紳曰。普法和議將成。甚爲可喜。然非持平明允。一秉至公。則約雖暫立。必不能堅守。以至於永久也。英國亦惟有嚴守局外之

義而已。今兩國暫爲息兵。衆心咸望其和。要之和則兩國俱有所益。戰則兩國俱有所損。如使盟約告成。則不獨爲法國幸。亦當爲普國賀也。日報主筆之士。聞普法和議消息。因以己意斷之曰。普法之和。人所樂聞者也。覽電報所傳。殊令人不勝欣喜。大英女王於闢議院之時。曾有言曰。若兩國各不相讓。則此戰恐仍未有止期。今於二月九日。普法立暫爲息兵之約。當時衆人見之者。皆謂有和之望矣。然和雖堪期。而所有議和條款中。有殊難從者。繼覽十五日電報云。暫爲息兵之約。再行展期七日。如此則爲和約將成之預兆矣。真有驗於女王所云者。殊可賀也。惟望實能講好。不再興戎。結兩國之歡心。彼此均沾其益。毋墜國體。當戰事之始。法固有

以激怒於普。而俾思麥云。法國前者妄有所圖。由普雄長日耳曼。由法侵吞比利時。此法之謬也。吾則謂普國之憤。已伸於師丹之一戰。拿破崙之朝已廢。此後民主而非君主。普之興師。其初本非有貪土地之見存也。而自見敵國之士崩瓦解。遂欲問取兩省以隸版圖。由此法民以義舉公憤。與普戰爭而構兵。遂至今日。法后出奔於英國。以不肯割地以獻人也。法廷執政大臣。亦不肯以尺土畀敵人。啓釁之初。原與法王戰。非與法民戰。此時法民願償餉。而不願割地。然勝者必出於此。而兵革流離。直至於今。戰事迄無了日。我所望者。暫爲息兵。卽和之機。兩國議和。皆屬有益。特普益更多於法。若相持不下。則普之傷損。必多於法。統核普國圍法之師。雖

少亦需一百五十萬。國中貿易負販工作者。皆必出而充當行伍。不獨臨陳攻戰。亦必保衛疆圉。防守所得城邑。自禮吳河而至法都。無不需兵。法民雖屢經挫敗。但主客之勢。情形不同。法在本境。而普則越國懸軍深入。以攻人國。此兩者固孰易而孰難。普必以重兵捍範各處。所俘法兵至四十萬衆。保母一旦生變。患興肘腋。若法則無是也。不必防虞於此。法民人人可以各自爲戰。舉國皆兵。此又法之易於普也。且法有勝於普者。海上戰艦林立。水攻之技。法爲強。普國商船。往往爲其所擄。普民之商於東土者。貨舶出入。多被法人所取。拘之於安南西貢。其中貨物不貲。悉爲法有。是其實事可驗也。其更勝者。法國多農人。習於耕植。歐洲諸國。皆所不逮。

普法戰紀卷一  
婦孺有力者。皆可以操犁鋤行播種。其男子盡可出充營伍。一呼而集衆百萬。亦易易耳。普恐不能及也。况乎普攻而法守。法守可以久持。普攻恐未能遽下。倘彼此互爭不已。則曠時積日。均有所難矣。至於此時之議和。或在法京。據前日郵船所述。想於法京也。必矣。夫法國斷難盡滅。而普國又不欲息兵。彼此紛紜不定。於英國實大有所碍。猶幸英國內亂不作。外侮不來。倘使猝遇敵國兵禍。有事於戰。則必協力同心。以與之從事。但兵凶戰危。英國斷不輕行妄舉也。好戰自焚。佳兵不祥。英其知之矣。法人立爹亞爲首相。議和之舉。一切以爹亞爲主。其餘大臣。或謝政罷歸。或仍如舊序。法廷政事。亦爹亞一人爲之總理。於是新選廷臣。爲之佐理。立雕科

亞爲刑部大臣。發孚爲總理外國事務大臣。卑吉爲總理內部事務大臣。西門爲禮部。林布烈爲商部。李父魯爲兵部。刺士爲工部。巴消晏爲船政大臣。和約大旨。其議已成。暫爲息兵之約。展期至三月六日爲止。波茶新都船政大臣。以電報達於新嘉坡領事。謂普法和成。自此息戰。以保通商。普軍擬於息兵期內。入法京據守。德祿蘇力責衆人。不應使普兵得入法京。法國人員群集國會。議立和約。從者五百六人。一云五百七十八人不從者二百人。一云五百六十八人。而後和約乃成。法京之質於普也。蓋已計無復之。然後出此下策。前後被圍。凡一百三十一日。外無援。而內無糧。勢已處於窮蹙。發孚詣普營立約之時。城中僅有八日之糧。廐中尙餘

馬二萬六千匹。此八日間。宰馬佐食。計殺五千二百匹。故爹亞發孚。皆以議和爲保國計。知至此萬不能嬰城固守矣。與普定約之明日。正月二十九日也。卽以法京外左右礮臺歸於普。普人分兵布守。以第六路詩厘順兵守埃父厘及卑士德礮臺。以第十二路塞慎尼兵守魯蠻威兒礮臺。那窩時礮臺。魯士尼礮臺。挪賤礮臺。以第一路巴華厘亞兵守沙連。但礮臺。以第二路巴華厘亞兵守門度路治。及凡華礮臺。諸礮臺皆當衝要之地。所以環衛法京者也。其切近者。莫如魯蠻威路礮臺。距法京僅四里。普軍一守此臺。無異扼其吭而絕其氣。法京已在於掌握中。蓋法人先獻法京外礮臺。次獻法京。以爲議和息兵地。非眞自去其屏蔽。而俾敵人得以相

制也。或譏前法國統領德祿蘇。自秉政以來。未嘗建一策。運一謀。躬自指麾。親臨行陳。以決一戰。竊號弄權。素餐尸位。及至法京將下。事不可爲。然後托病不出。置身事外。此眞小人之尤者矣。或謂德祿蘇所爲。更甚於巴彥。國家將興。賢智迭生。及其敗也。庸愚輩出。而國是遂爲其所誤矣。吁。可不謹哉。普軍攻取法京時。軍師毛奇特獻陳圖於普王。以再攻法國未下之地。俾示之以準繩。普王審厥地圖。出奇無窮。其用有端倪。莫測之妙。遂大悅。藏以待用。迨息兵盟成。而陳圖之妙。遂未之旋行。足見軍師之才。餘於應敵云。正月二十八日。法國廷臣發孚。在華西路普營。與普相俾思麥所立暫爲息兵之約。計十有五款。備列如下。一現在普法兩軍。暫爲息戰。

法京於是日舉行。各省於三日內舉行。由是日始。凡息兵二十一日。倘非再有展期。即於二月十九日亭午為止。息兵之時。兩軍所札營壘。仍如其舊。彼此各分界限。如由加華道侯郡海濱般依滑起。至迷賢尼郡東北隅。歷拿止。又由美賢尼郡歷拿起。徑達阿尼郡沙土郡分界處。以至摩倫尼北方止。此皆普法兩軍駐營處也。其沙土郡恩得因來華郡來華因思亞郡來華烈郡仁尼郡以至加理厘士蕩東方高多亞郡依華郡及與恩尼郡相接處。仍由普軍築壘據守。其餘普法兩軍之筭在高多亞府瀆府招拉府者。一俟查明界限後。再為增入約中。兩軍所筭。雖未知其詳。然在此三郡界限之內。普軍據其北境。法軍據其南境。由巴司加厘士郡北方機

核以及蘭嘉礮臺。又自其地左右十畝許。遠以及夏華更從耳棣厘突。直達勝羅温。皆在普軍所筭界限之外。凡兩軍駐筭之營。必與所分界限相離。其遠約距機路

機路裏得法國語。約當華地一畝。

蔑得者十。兩軍進退行止。出入遊息。一切由其自便。兩國海上皆行息兵。在息兵期內及立約之後。未出告示曉諭之前。若有俘獲船舶軍士。一經訊明。均須釋回。除瀆府招拉府高多亞府俾路佛城。不在息兵之內。俟勘定兩軍所駐界限。方行再議。二暫為息兵之故。蓋欲法國護國廷臣。公舉人員。以赴國會集議。俟議定。應行罷兵。或再決戰。所有國會人員。係在波茶新都。刻期入聚。凡日耳曼統兵官。必使其得以自如。從容從事。三法國統兵人員。必當立將法京外鎮護礮臺及器



械甲仗。交與普軍。法京外大小村鄉屋宇及與礮臺相間之地。俱交普軍據守。此外又必畫分法京城垣內外界限。嚴禁彼此不能相越。其交割礮臺章程。以及畫分界限之法。俟後另議。四在暫息兵期內。普軍不得入法京。五法京城上所有巨礮。安置礮架者。盡行撤去。其礮架經普營委員察驗。然後命其安置何處。六法京及礮臺內兵丁民壯。水師軍士。悉當獻俘。但留一萬二千人。以備鎮守。法京不在此列。獻俘之兵。循例釋械。由普官所命。暫留城中。於暫息兵期內。不得出城。法官當時加巡閱。毋使潛逸。法官職名。須繕具清冊。交呈普營。至息兵期滿。然後獻俘。惟獻俘官員。於軍務未畢之日。准留軍器自衛。七護勇巡丁。均得留軍械。以便彈壓法京。但

不過三千五百人。無得逾額。所有招募鄉勇。法國朝廷宜立例刪除。八一簽此約之後。普軍未往據守各礮臺之前。普國元戎。任由法官自便。往赴各省。並設法接濟法京餉糈。九既獻礮臺之後。如上所列。置放巨礮。停撤兵勇兩款。皆當遵行。其接濟法京運道。或由輪車。或由水道。任其自便。惟不得在普軍所據之地運入。其採取糧餉。均在普軍所據界外。購辦。如係普官准行。則亦無禁。十凡欲出法京者。必至法官處。領取文憑。任由普官勘驗。其選舉集赴國會人員。並委員等。任其往詣各省。概無所阻。惟朝自卯正。暮自酉正。方準出行。十一法京須捐佛狼二百兆。以供軍需。於暫息兵期內第十五日。交出。其若何科派多少之法。俟普法官員會同酌議。十

二在暫息兵期內不能採購貴重之物以作將來交與軍需按質十三在暫息兵期內凡藥彈器械不得運入法京十四自軍興以來迄於見在所有法人陳擒普軍立即交出彼此互易其交與之地在亞棉城里蠻城威蘇兒城皆有普官駐劄之地取其道路之相近者各從所便普官所俘法軍亦各就近處交與法人所獲普國商人船主亦與普官如式相易凡兩國互易俘兵視其數目之相當互易俘官視其品級之相抵十五在華西路普國大營代設一驛館以便傳遞法京各省往來信息惟書函毋得緘封以憑核視以上所立十有五款兩國大臣均簽名蓋印於約中以昭信守此普相俾思麥法外部大臣發孚所立之暫約也斯約既立於是頒選

舉人員之令於國中惟是所選人名實錄未及刊單宣示僅知布冷馬田魯司佛三人均在選中蓋聲譽最著者也珍威兒王子張加拿將軍皆已馳赴波茶新都法京之下在正月二十八日說者遂謂普法啓釁見仗之日爲七月二十八日士打拉士卜出降之日爲九月二十八日蔑士獻城之日爲十月二十八日今法京願下求和之日爲正月二十八日屈指計之軍務不振之日適與軍興伊始之日相同雖適逢其偶然不自此日先不自此日後而偏厄於此一日因以至於再至於三一日若二十八日之爲日如陽九百六專不利於法國者其日與事相值耶抑事與日相違耶雖不必狃於吉凶特無以釋其疑耳而豈其然哉夫周以甲子興紂以甲子

亡同一甲子耳。而興亡頓異。此在德不在日也。又何疑焉。法人以加厘波地之仗義執言也。特公舉爲廼士人員。時廼士小有變亂。旋經地方官彈壓撫綏。卽就安靖。加厘波地將軍。以此時普法和議旣成。釋俘講好。從此方將藏甲兵。偃干戈。冀享昇平。永敦輯睦。何用異國預其間爲。因是辭不就職。二月十三日。加君將辭行返國。上書法國大臣曰。曩蒙不棄賤愚。渥施寵愛。俾一介微才。統轄和斯克士兵。勇以履行陳。命決雌雄。今和約已成。軍防將撤。所有一切兵務漸竣。不佞無庸備員於其間。謹謝職守。以歸桑梓。用瀆清聽。祈副所懷。書旣上。法國朝廷特爲報聞。其答書大略云。將軍奮興義舉。匡助小邦。公憤所激。上薄霄漢。凡我民人。無不感戴。日昨

將軍所呈兵部之書。求欲辭職旋歸。業已轉達朝廷。準如所請。惟敝國用謝將軍之盛意。同仇敵愾。曷任寵嘉。甚惜將軍去之之速。將離茲土。而旋故國。惟將軍統率我法衆。披堅執銳。身臨行陳。力保疆圉。功烈赫然。我國豈敢有忘。將軍前程遠大。行矣。自愛。加厘波地旣辭位解組。卽偕其子若婿。回以大利。取道於摩塞里。航海而旋。將登郵船。復諄囑將士曰。嗟爾有衆。要當發奮爲雄。宣力於國家。再造丕基。同扶王室。今者雖當邁會艱時。遭逢厄運。但輿地依然。山河仍在。不久卽可仍爲大國。政由民主。可冀自強。夫爲民主。斯能蔚成法國中興之治耳。嗚呼。治不可忘亂。安不可忘危。勿謂議和之後。可以偃武備。弛邊防也。亟宜整頓軍威。訓練兵法。爲再戰

地復仇之舉。期必不遠。惟能相愛如一心。始可戮力以制敵。爾衆勗哉。相見有期。請從此別。議者謂加厘波地雖不辭勞勩。勿憚艱難。來援法國。同拒強鄰。而兩兵相交。不爲不多。彼守此攻。不爲不久。未聞建赫赫之勳。爲法國轉敗而爲勝。疑其用兵之精。固不如普之王子郡王耶。不知大厦非一木所能支。大局非一人所能挽。法糧儲匱缺。器械鈍敝。將士皆自私。兵卒不用命。迨後臨陳者皆非素習之師。隸營者悉係烏合之衆。此無異於驅市人而與之戰也。加君雖能兵。其奚能操必勝之券哉。此不得爲加君難也。至其義憤奮激。振鑠千古。亦近今非常之人哉。有以大利人碧蘇者。加君麾下。將也。歷官有年。法國戰事畢。乃解組遠游。遂至東方。駕舟往來於香港新嘉坡間。習操貿易術。亦流亞也。二月十四日。國會人員。馳赴波茶城。集議者三百

人。十五日。各處食物紛至。法京兵民。殊爲安堵。初發孚與普訂盟之時。議於立約後十五日。酬以佛狼二百兆。以犒普軍。以一百五十兆。與北日耳曼。五十兆。與南日耳曼。擬於二月十一日。取於法京銀肆。特其數一時未及咸備。至其科派之法。或揣量土地之腴瘠。或核算民數之多寡。如阿得鉢公捐十八萬四千。堅尼則按人數抽捐。每人輸二十五枚。雕鼻捐一百十萬枚。第民間窮匱殊甚。一時未能措置。因先與十萬枚。其餘則貸之於英國。其在村鄉。則每村以二萬三千枚爲率限。二月十二日。先與其半。餘於二日後全繳。堯邑徵收十八萬四千。官民不從。遂執太守置諸法。以其抗命也。兒彥邑徵收六百萬。若不卽捐輸。當膺重罰。且將邑中巨紳。執法

嚴懲。飛禽捐六十四萬。邊非捐四萬八千。拉沙卑兒捐一萬六千。機士捐十萬。李厘般捐二十五萬。招威捐一萬二千。阿厘威兒捐一萬一千。各處紳民。竭蹶輸將。然後其數始盈。乃得以供給普軍云。法國廷臣自德祿蘇以病去位。監必得以爭辭職。總理朝綱者。尙無專屬。法京內外臣民。皆注意於爹亞。以其深識遠謀。齒高德劭。足以鎮率群僚。綱維百事。以宏濟於艱難也。乃公舉之。爲大統領。若位米利堅之伯理璽天德。爹亞固讓弗遑。衆意不可辭。至再三不得已。勉狗所請。約以暫爲攝理。俟後別簡賢者。初衆意欲迎比利時王。以王法國。俾治法之臣民。庶幾事權得統於一。比利時王固辭不往。故大寶未有所歸。或謂按昔布來士讖語云。兵禍既啓。死

亡相繼。以後訊使三至。初爲凶耗。繼爲急音。三則有嘉消息矣。其言法民之被殺戮。法京之當殘破。業已一一皆驗。但言三至之使。足乘水火而來。所報法國踐位之王。不在於法。擇於他方。入繼法統。使其果應斯言。則比利時王雖欲不往。此外必有當之者矣。普法息兵盟成。雖許各處爲之接濟食物。得以入法京。而貧乏之民。飢饉流亡。轉死乎溝壑者。時所不免。大英朝廷發帑購粟。運載前往。以濟其急。倫敦京都之民。聞之無不踴躍輸將。糾衆集貲。廣備食物。以紓法民之困。法國廷臣發孚致書於英國總理外部事務大臣伯爵加藍威兒。并以伸謝厚貺云。頃者接見馬式。據其所述。貴國饋運糗糧無數。來濟法京之困。現已抵加來城矣。此項鉅費。均係

出自大英朝廷之國帑。倫敦衆姓之公捐。厚惠隆情。眞足令人感泐五中。而難以言宣者矣。如是竭誠樂助。兩國輯睦之意益深。而所謂爭鬪奪害之情者。復何自而起。誠哉貴國之義風高尚。爲天下之表率。列國咸當則效者矣。敬惟貴國子民。周恤患難。視若一家。惟望閣下代爲致謝。貴國子民。於靡旣。嗚呼。惟我法京兆庶。經歷多艱。然此難恐未已也。必越至後日。始獲平康。我民雖在顛連困苦之中。未嘗不自相慰勉。以爲緣國家之事。以至斯極。要當盡力堅忍而已。今遠蒙貴國矜憐。自可心足意慰。以償此艱難也已。普法和議欵中。賠償普國軍餉。計佛狼五千兆枚。分爲三年交納。今歲一千兆。以後兩年。歲納二千兆。其未繳者。按歲起息。於最後一年。

一齊清償。所有割與普國兩省之地。其價值準作佛狼五百兆。法國廷臣之始終持和者。惟爹亞也。法京旣下。仍出於和。一切皆如爹亞所逆料。然後知爹亞之智爲不可及也。於是舉國而聽之爹亞。虛上位而處之。和議大端。由其主裁。而歐洲列國。亦無不知有爹亞矣。按爹亞法國摩思兒人也。生於一千七百九十七年。其父以布商起家。經緯從心。尺寸在握。屢操奇贏術。以致巨富。爹亞生具殊秉。迥異凡兒。人皆以爲其父慶。咸曰。他日之能充君門閭者。必在是子矣。父亦甚奇愛之。期望殊奢。蓋其清逾老鳳。瑞靄祥麟。雖在少時。已能嶄然自露頭角。少長立志不凡。讀書過目成誦。如宿習。均能抉奧搜精。不遺餘蘊。尤潛心於律學。有所駁詰。反覆剖析。援

音法單經卷十  
引無窮。所論具有證佐。識者知爲通才。無敢量其所至。後欲自抒所見。在法京設一日報局。曰依成那。凡所論斷。奇闢暢達。出人意外。正如濤翻海立。石破天驚。一時無敢攖其詞鋒者。然名以是高而忌者。亦由此深矣。曾作論力辨法國前王查魯士第十在位時政事之非。是年七月。朝代遂更。衆仰爹亞持論之公。斷事之嚴。公舉爲議政紳士。爹亞益自激奮。冀副衆望。其所論列。識見高遠。雖以人主之尊。面折廷爭。無所退讓。時前王路易非立。方欲與西班牙共圖兵事。爹亞力行諫止。黼座雖惡之。然不能無爹亞也。迨首揆毛路與廷僚不睦。罷政歸里。解組而去。國人乃舉爹亞位冢宰。贊襄庶政。總理朝綱。援立拿破崙第三。復國踐祚。爹亞之力居多焉。其

爲相時。諸大政如建築京外礮臺。翌衛國都。謂禮吳河乃法國邊境。何可輕以授人。於固保疆圉之事。無一刻不以關懷如此。後欲與英構兵事。不果行。毅然辭相位。家居著書。日事鉛槧。凡所述撰。皆揚拿破崙第一。而抑拿破崙第三。力詆痛摘。幾無不至。廷議以爲指斥乘輿大不敬。坐是。遂於一千八百五十一年。被罪遣戍。久之。賜環。年六十。爲法京紳士。臨事指陳。口若懸河。初無異於少壯時。又其意見所及。每喜逕行直遂。不能稍爲委曲遷就。以求合於人主。因是屢與法王相左。法王欲強羅馬教主。而爹亞則欲弱之。法王置日耳曼於度外。而爹亞則謂日邦日漸強大。實貽吾國之殷憂。蓋以爹亞之深識遠慮。旁矚高瞻。實有見及法國後日必有敵國

音法單經卷一  
外患之虞。而法王弗悟也。爹亞經民間公舉國會人員。前後凡二十有四。其言之善。彰彰在人耳目間。固未易更僕數也。及普法軍興。爹亞年七十有七矣。當紳士之集議於下議院也。衆人皆以爲當戰。而爹亞獨以伐普爲非。慷慨進說。逆知法國之出兵必敗。衆人皆咎其迂。至是始信。咸曰。爹亞誠能燭於幾先者矣。乃群舉其出使諸國。與普議和。而爹亞忠於爲國。不惜以暮齒孤身跋涉往來。至三四萬里之遠。誠爲人之所難能者矣。至其出外游說。事雖不成。而心則可鑒。宜其今之居上位而無慙也。論者謂執干戈以衛社稷。武臣之專任。亦武臣之能事也。然有時道處厄窮。運丁元二。離析分崩。危於朝露。有非一戰再戰。遂可挽回於萬一者。於此有

人焉。展其生平之經濟。竭忠盡瘁。以保朝廷。以衛民庶。俾轉危而爲安。易亂而爲治。奠邦基於磐石。固國勢於苞桑。是豈肆力於原野者所能優爲乎。如爹亞者。職雖文臣。而力實過於武士。亦非徒爭長於口舌間者所可比也。跡其長樞廷。謀國是。所見遠大。實駕群策群力。而上之。歐洲中耳其名者。多推爲國之柱石。其以一身繫輕重者。豈淺鮮哉。而說者乃疑其主戰主和。前後異轍。或譏其首鼠兩端。不知今昔勢殊。建議者。曠觀大局。默揣敵情。事若轉圜。詎容墨守。至於事與願違。功隨遇齏。則以所言之未獲盡用也。而能使天下後世。尙論者深爲嘆息。則其人亦足多矣。然則如爹亞者。謂非人傑也哉。近時中外文人。議論爹亞者。其言不一。今爲略錄一



二。以見大凡。華亭隱士曰。春秋傳書。晉侯賂虞伐虢。虞公貪璧馬。許假道。宮之奇諫。虞公拒之。致亡國。宮之奇可謂忠矣。然而拒諫遂去。忠猶未盡也。不若今之法國老臣諫而不聽。不惟不去。且竭忠於存亡危急之秋。爲尤忠。法國老臣爹亞年七十有七矣。忠盡賢勞。勤施於國。初普法之開釁也。相臣阿厘華主議請軍餉五十兆以戰。廷議僉同。獨爹亞諫謂。法與普兩大國也。強敵也。所請諸大端。普無不從。今爲我國計者。無始禍。無構兵。法王弗聽。及師丹之敗。君降將俘。國人更立新統領。以主國政。爹亞可以去矣。乃不忍去。而竭智盡忠於國事之垂危焉。爹亞說英俄奧意四大國之君。出而止兵。以退敵。身歷三萬餘里。僅一子從。四國雖未卽如所請。其

鞠躬盡瘁。可謂忠矣。歸國後。復與於議和之役。往來於法京普營華西路多亞城。足無停趾。迨英國貽書勸和。而爹亞謁普相。請息兵。普相感其言。召師武臣而議之。咸曰。必欲運糧入法京。必質礮臺。方報可。爹亞對曰。夫城以礮臺爲衛。礮臺爲質。城守斯難。虞事變不測。議遂寢。其忠且智。又如此。然普相感其忠。謂之曰。我亦欲和。如君命主和。則事可定。兵可息矣。其後和議之成。卒爹亞一人爲之主持。從此偃息干戈。保衛疆場。睦鄰善後。養兵息民。以共濟於艱難。皆爹亞之力也。嗚呼。異國純臣。忠誠若此。中國之臣。當何如耶。書之以勗凡爲臣者。西國日報中有人。作爹亞始弱法國論一篇。而吳郡逸史氏爲之辨。以爲如爹亞者。亦未可厚非也。今併爲附

音法單經卷十  
錄焉。其論曰。法國天下莫強也。而一旦遂至於一蹶不復振。嗚呼。是誰之過歟。夫治必有所由興。而後國始強。亂必有所由起。而後國漸弱。法國之強極於拿破崙第一。而其弱也。則實自爹亞一人基之。顧天下之人。聞余是言者。鮮不以爲非。或有驟聞之。而色然以駭者。何則。天下方以爹亞爲智謀忠義之士。所以存亡持危者。皆爹亞之力也。獨一人焉。指爲禍胎罪首。不大拂衆情也哉。當拿破崙第一之得國也。衆情推戴。上下悅服。奮揚國威。厚集兵力。歐洲列國。莫不畏之如虎。奉之爲上國。會盟征伐。諸大政。悉集於法京巴黎斯。會議以爲定。國勢之盛。直至於今。普之起於東方。僅十餘年之間耳。伐奧地。里以平外侮。聯日耳曼以結內援。勃焉以興。莫之

能禦。法於此時。要當隱結其歡。外引爲助。方不失爲睦鄰保疆之道。乃爹亞獨奮袂以起。謂法何可使普坐成強大。而晏然罔覺也。普之強法之弱也。恐不第弱而已。機發於先。而害踵於後。有必然也。謀國之士。爭相播論。或以索地之說。進相臣。或以闢疆之策。干人主。好大喜功。浸與普隙。而其禍遂成於今日。嗚呼。謂非爹亞始創其端哉。譬諸水焉。發源於濫觴。而泛溢於江河。譬諸木焉。芽蘖於寸土。而扶疎於山嶺。則追論於弱法之故。不歸於爹亞。而誰屬哉。今者法益弱。普益強。曾不能少爲挽回補救。而獨以扶亡國。主和議。籌恢復。諸舉。推之於爹亞。若以今之爹亞。並非昔之爹亞者。豈不異哉。嗚呼。自古喪師失地之禍。無有甚於此者。惟亞墨利加南北

相持之役。髣髴相似耳。乃法民皆以構兵啓釁之由。諉過拿破崙第三。而無敢代爲辯一詞者。此旁觀者所不平也。故據爹亞前事。而論之如此。其辯曰。余友慎墨子嘗讀爹亞始弱法國論。以爲其旨顯。其詞微。而其意嚴於斧鉞。歎其持論之奇。而仍不詭於正。來告於逸史氏曰。如此論者。獨斷自衷。不徇於俗。識遠而高。見精以卓。知人論世。別具胸襟。旁矚遙瞻。迴超軌躅。有旨哉。其言也。子其許之乎。逸史氏曰。此所謂深文周納。而不明天下之大局也。今夫天下事。有常有變。有經有權。有緩有急。有速有遲。常變時也。經權用也。緩急勢也。遲速機也。明於時。審於用。熟於勢。達於機。而後天下之故。可知矣。苟徒膠於成見。而遽欲品第人才。鑒衡當世。則如隙中

觀戰鬪耳。故善觀人者。必當總核其生平。統觀其前後。相衡竝絜。而其人之心見。若僅一端一事求之。則鮮不失矣。爹亞者。今之深識遠慮之士也。上下數十年間。於國家興衰所係。早已洞矚於其際矣。普魯士本次國耳。而使其坐成強大者。法也。普何以強。一強於伐噠。再強於伐奧。自是而普不可制矣。故普之強。法有以致之。而法之弱。法自爲之。普法土壤毗連。而依非唇齒。法強則制普。而普弱。普強則制法。而法弱。此其大局所關。人知之。而法之身居局中者。反昧焉。法誠能於伐噠之役。合噠以攻普。則後日普必無伐奧之舉。其失策一。法又誠能於伐奧之役。助奧以襲普。則普必無今日之事。其失策二。而爹亞早已明見及之。亟亟焉勸法以乘間

擊普爲自強計。使從其言。普必不強。法必不弱。而今日之釁。復何從而起哉。嗚呼。爹亞誠不可及也。鄰之厚。君之薄。此燭之武告秦君之言。誠老成人善於謀國者也。未可爲爹亞非也。爹亞於始之伐。噍伐。壞。皆主於用兵。於今日之議。獨主於不戰。非前後相反也。正其明於事也。使從其言。普雖強。而法亦可以不敗。彼法國廷臣無爹亞之才。而從而隨聲附和。以取憎於鄰國。卒至釀成此變。而論者遂欲以此歸咎於爹亞。則殊疎矣。嗚呼。以此責爹亞。則爹亞豈任受咎哉。故我不得不爲爹亞辯。法王幽居加些兒。常忽忽不樂。雖去位失國。而於普法戰事。利害所繫。未嘗一刻忘於夢寐間。憂憤抑鬱。一切寄諸於筆墨。聊以消遣日月。普國厚其供帳。無使或有

不適。著書之暇時。亦遊目騁懷。涉獵加些兒風景。惟是車轍所至。南北東西四境。均不得出三十六里之外。今聞普法和議將成。所有割地酬餉。一如普約。益憤懣不可言狀。遂作一書。郵示國中。自明己志。以責法廷執政諸臣。其書曰。不穀不吊。躬丁厄運。至於棄位失國。上負祖宗。下愧臣民。每一念及。懷慙無地。嗚呼。尙何言哉。尙何言哉。自爲亡虜以來。緘口卷舌。不敢妄措一詞。蓋悼實命之不猶。而銜哀於靡極也。當兩國軍事方殷。戰守孔亟。奮攻苦拒。相持於危急存亡之際。不穀於此時。未嘗參一議。置一言者。慮執政之未必能從。徒足以擾我民心。民心離渙。則一散而不可復用也。今者和議垂成。方擬息兵講好。然後環顧我國家生民塗炭。疆宇分崩。

創巨痛深。災危禍酷。自立國以來。未有如此之甚者也。不穀至此。豈遂可默爾而息哉。設使蒿目徒悲。撫懷自喻。則人將議我爲忍矣。曩者不穀兵敗於師丹。計無復之。獻城納款。所以不卽定通國議和之大局者。以亡國賤俘。復何面目。妄有所論列。卽或云云。議者必詆其爲私已計也。自出都門。朝綱國政。悉委諸后。此時和戰利害。在廷翌贊諸臣。必能熟揆而審處。孰意兵禍之烈。一至於斯也。嗚呼。是誰之過歟。於時法國雖屢經挫敗。而巖疆未罹乎鋒鏑。列郡尙峙。夫屏藩其勢猶雄。足以自固。其爲普兵所下者。僅邊徼數省耳。至於法京巴黎。固自若也。強鎮輔於外。則援不孤。重兵守於內。則力未弱。比戶無流亡之慘。列廛無烽火之驚。令忠誠勇智之士。

處此。所以握勝負之轉機。持存亡之變局者。甚易爲耳。乃不意敵猶未來。而亂先自作矣。彼妄冀乘間竊據大寶。別立新朝。以號於國中曰民主。欲以蠱群情而惑衆聽。議政舊章。一切變置。國后以被逼出奔。王子以見危遜國。遷朝於棣威離院中。政令由己。威福自擅。伏念不穀嗣統以來。兆民歸附。國會大集。同聲推戴者三。悅服歡呼。如出一口。今一旦失地喪師。幽居敵境。此後之事。正未知如何。而巨慙神姦。又從而媒孽其間。尙奚望哉。然使國家不至於顛危。基業不至於傾覆。復讐克敵。蔚爲中興。則不穀雖終身流徙於遠方。亦何足惜。此不穀於夢寐中。常喟然太息者也。顧彼公麼。妄稱護國統領。揆之於義。豈得曰平。然不穀猶冀其破黨援之成見。拯

黎庶於將亡。戮力同心。克保疆土。不穀雖居局外。亦將感激稱羨之不暇。乃視干戈爲兒戲。等民命若草菅。初何嘗操勝算。決前籌。而遽爾釋甲罷兵。北面於敵。以京師之守禦如此。仍樹降幡。所謂運摧強之策。興驅敵之師。至此何有。徒見骨肉膏於草野。脂血溢於川原。財竭民窮。儲空糧絕。四郊兵燹。極目創痍。嗚呼。言念至此。卽糜篡國者之體。猶不足以蔽其辜也。如謂朝廷不可一日無君。民人不可一日無主。則有前朝之公舉在。乃妄者遂欲假此以窺竊神器。更易政令。其所頒行改革。何一由於民間之公議。夫彼之所欲。非民之所從。其不循推舉也。私其徒自篡竊也。僭如是。而欲激揚士庶。翦滅仇讐。拯民於水火之中。奠國於艱難之會。安可得哉。亂

之不能遽戡。和之不能遽召。情所必至。勢所必然也。嗚呼。當此危疑困厄之交。內爲強敵所侵凌。外爲歐洲諸國所覬伺。此正忠臣義士奮發有爲之日。感激圖報之秋也。要宜如向者一德一心。同志同體。以竝修夫人事。而默挽乎天心。俾國家有磐石之安。苞桑之固。至於不穀者。欺藐出自權奸指摘。皆非正理。遭逢不幸。莫罄名言。溯自二十年以前。汝等四次援立。不穀讓再讓三。方順輿情。勉承大統。此爲如何鄭重乎。不穀言此。豈欲圖思復辟。重返故都哉。值此大勢凌夷。土崩瓦解。豈再容一人怙權貪位於其間。所以不能無言者。國會既已依例集議。則當上伸公論。下洽人心。夫何者。爲國家之真主。則公論之所注。人心之所歸者是也。衆之所向往。謂

之王。民之所贊襄。謂之君。衆去民離。謂之獨夫。故朝廷者衆之所聽命也。君主者民之所秉承也。如是可以絕黨同。臨衆庶。治已亂。而反之正撥。既危而措之安。民始惺然可觀乎。昇平。尙其廣闢講堂。用能祈天悔禍。庶幾感召太和。克承無疆之休。不穀有厚望焉。是書既至。國中傳頌一時。米利堅即合衆國亦稱曰聯邦。粵東人呼之爲花旗。紐約都城中。日耳曼人之旅居貿易於其地者。實繁有徒。皆已多歷年所矣。相與議論普法戰爭之事。謂普之伐法。始爲義舉。終爲貪功。於是群入日耳曼議院。秉公辨論。咸曰。普自師丹之戰。法國王擒師覆。其忿可紓。普自此當戢兵講好。不戰而退。此眞所謂仁義之師矣。自此而後再與法從事於疆場。相持於軍旅。攻城掠地。深入長驅。是直讐法

民耳。非報怨於法王也。斯時法民與普戮力戎行。豈出得已。是由禦敵而非以邀敵。然則普今日之攻法。豈得爲一秉於公也哉。揆之於理。實有未平。普於是役也。割地兩省。指爲舊土。亦非義之所宜出也。今求聯邦朝廷一秉至公。仗義執言。立助法國。戰事既止。當必別籌善法。嗣後歐洲各國。偃武修文。止戈釋甲。毋恃乎兵士。毋藉乎鎗礮。創設歐洲公會大堂。各國有事。集議於此。有不循正理。不秉公法者。衆共非之。如此歐洲可以長享昇平。而不復有兵革流離之苦矣。日耳曼人所論如是。是亦有一得之見存也。逸史氏嘗論之曰。天下莫患乎外托乎仁義之名。而內懷乎兼併之實。處心積慮。圖人之國。以爲己利。而反以諉過於人曰。是實激我至此耳。

余豈好戰哉。於是自立於無間之地。而因以箝制夫列國之口。嗚呼其深謀詭計爲何如。普之於法。雖不至是。然觀郵報中歷載前後事實。則其伐法之念。蓄之已久。卽無西班牙爭立王子一事。當必復有他端可借耳。迨乎兵戈旣動。勝敗迴殊。則繫乎天矣。總之法以驕亢無備。故蹶。普以詳慎有備。故興也。師丹之戰。王擒國蹙。勢固瀕危矣。然法若有人可以不戰而屈。普之師遣一介以告普王曰。天禍敝國。獲罪上邦。畏君之威。師徒撓敗。然大王所欲興師致討者。惟一人耳。非與敝國之民爲讐也。敝國之民。其誰欲戰以徵咎於大王哉。不腆敝賦。敬犒從者。亦以竭吾民之力而已。其餘非所聞命。大王若不棄敝國。而鎮撫之。俾得安其耕鑿。保其室家。豈惟

敝國仰戴盛德。歐洲列國實嘉賴焉。若大王不許。則敝國亦必釋甲偃戈。開關以迓王師。何敢與大王爲敵。以一矢相加遺也。惟大王其圖之。其貽敝國億兆生靈。無窮之福。則大王之國。亦無疆惟休。如是則普雖欲戰。必不可得。卽曰不然。亦斷不致今日之顛危矣。歐洲列國必有起而議之者。奈何反幸國主之蒙塵。乘機爲變。竊據大寶。政出多門。貪功罔顧。而俾一庸碌無才之德祿蘇主持其間。猜嫌播煽。國是日非。內亂不甯。外侮斯棘。國之削也。實自取耳。嗟乎法之欲逞其強。實法之愚耳。沈機觀變。忍垢待時。是在大有爲之主哉。日耳曼人有嗣後請勿用軍士鎗礮之說。此正襲春秋時向戌弭兵之謬論耳。兵者不可一日而去者也。普相俾思麥以弭



兵餌法。而自於國中晝夜籌戎防。法墮其術中。遂至於敗。然則弭兵固可恃乎哉。當普相弭兵之說興。而西國傳道之士多信之。此正儒生迂謬而無遠見者也。日耳曼人所論意雖至公。而事恐未果行也。二月二十六日。法國統領參亞。審觀時勢。內察於國。外察於敵。見暫爲息兵之期。屈指將屆。法京已爲普軍所扼制。搯吭控首。喘息皆難。若不卽求和。而仍出於戰。則郡王之兵。乘勝南下。法國之創殘困逼。當有不堪設想者。乃卽偕法廷大臣十五人。馳赴華西路普國大營。與普相妥議立約。所立條例。凡有十款。約首之詞曰。今者普相臣俾思麥奉日耳曼皇帝命。及承巴華厘亞戈天畢總理外部事務大臣暨巴甸邦部臣之命。與法國民主之國統領參

亞總理外部事務大臣發孚。各授全權。便宜行事。議立和約。法國謹將以下所允諸款。上呈普王。一割邊境兩省地。一爲亞路西士全省。其中惟俾路佛城。仍歸於法。一爲羅連省之半。其中如蔑士如泰安威兒。均隸普國版圖。二法國賠償普國軍餉。計佛狼五千兆。分三次繳清。於一千八百七十一年。先交一千兆。其四千兆。限以三年交楚。由簽立和約之日爲始。三立約之後。所有據守各郡普軍。卽當由漸撤回。自法京以及西境。撤兵之時。卽將第一次之銀先交。其未交者。按年納息。歲於百中取五。四普國已下各郡邑。撤兵時。毋得勒捐軍餉。所有留駐法國之普軍。其費應由法國供給。其所供多寡之數。由普國武員秉公酌議。五所割之地。其居民願歸

何國者聽。且必假以時日。俾得從容部署。普國朝廷。毋得意存難阻。故必立一妥善規條。便其行止自如。於外更立通商和約條款。務臻至善。六所俘法兵。其未經互易者。自立此約後。應卽釋回。法國朝廷須預備輪車。前赴普國交與。普官經辦其事。以便將所俘軍士。一概交回。一切行李之費。悉由法國承辦。七波茶國會。普國君主。一自妥立此約後。卽在比利時國京師巴刺斯兒。議立通商善後條約。八既立通商和約後。凡普軍所據各郡。均卽交回。法國自行治理。其所設地方官歸普統轄。由普官派兵往駐各處。分守保衛。惟民間案牘賦稅。仍歸法官徵收辦承。九凡普國未下之地。不在約內。十立約時。須法國廷臣衆議僉同。由波茶國會。普國君主。裁

奪施行。此約中論割地撤師。最爲詳核。法國割東境交界地。與普管轄。如在西北隅。由吉殿南城至兒心勃。又由吉殿南城至泰安威兒。在西南隅。自布禮村直達捫得華刺門田村。以至龍葛村馬離阿仙村華般威厘村。更及哥士城維安威兒村巴思亞村威韋兒村。而蔑士之西南境。與薩雕沙連村界址。均在其內。自此而往。與邊頓葛相連。又與司厘捫司兒左右一帶山巒。逶迤沿接。逕及沙比。以訖拉吉爲止。復由拉吉至丹干威倪。又由丹干威倪至司厘拔蘭時。威蘇士。此三處皆岡嶺參差。沿麓而行。至沙覓司界。所經道里。如沙兒村坡亞村布魯時村哥羅刺魯士村備連村蘭立村梳蘇亞村聖布里時拉魯士村。又自疎兒村與勃朗郡阿冷郡疆址

交錯。直達於俾路佛城爲止。其在南方。由和雲難逕趨至參利。以達波龍村扶來寬田村。又逕至裁沙厘村。參厘村。以迄瑞士國交境爲止。所割之地。永屬日耳曼版圖。一立此約之後。兩國各遣人員往勘照。約區分地界。將各邑各村人民物業。均分開列。若有未合之處。彼此申明兩國朝廷。以俟定奪。所有分定地界。照一千八百七十年九月。普京考察地理會所刻輿圖。加以綠色置於此約內。以便覽觀。分割界域。由於兩國願意。其地係在摩司兒河上之郡。由聖布里屈刺門田左右。馬離阿仙鄉。維安威兒鄉。以至里桑威厘西隅。均當割歸日耳曼。惟俾路佛城仍屬於法。撤師之法。悉依次第。以交餉之多少。爲撤師之衆寡。一經立約之後。普國必當先撤

法京之兵。次撤仙河左濱礮臺之兵。迨兩國武員酌商既妥。然後普兵之駐節於嘉華度全郡。阿尼郡。沙土郡。要亞恩來華郡。來華里郡。來華恩司亞郡。因得恩來華郡。雍暎郡。仙宴花厘亞郡。要亞郡。仙恩瓦士郡。仙恩蠻郡。阿鼻郡。高多亞郡。以至仙河左濱者。盡行撤退。法兵亦必退駐魯華河內。俟立通商和約後。方準渡河。法京駐防之兵。限留四萬人。以便鎮守各處重地。一立通商和約。及如上第二款所云。交與佛狼五百兆之後。凡仙河右濱。及法國東境所屯之普軍。皆當由漸撤歸。自至近法京之地爲始。按仙河右濱諸郡。卽岑郡。瓦士郡。仙宴花厘亞郡。仙恩華士郡。仙恩蠻郡。皆是也。而仙河左濱礮臺。亦在撤例。此初交佛狼五百兆。撤兵之章程也。

再交佛狼二千兆之後。普軍獨據蠻郡亞甸尼城阿蠻城。藐士城和士克城。藐亞郡俾路佛礮臺左右要地。以爲質。留駐普軍。以不逾五萬爲額。以俟繳納佛狼三千兆後。始行全撤。若法人願以國庫爲質。當俟普國君主允許方行。其最後所徵佛狼三千兆。乃係三年始得交楚。故於立約之日爲始。核計息銀。歲於每百分中。徵取其五。

普法戰紀卷十

終

校合山田榮造

